

**ASO GAFUA, 15 FEPUARI 2021**

*Na nofoia e le Fofoga Fetalai le Nofoa i le itula e 9:29 i le taeao.*

Tatalo.

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofa Fautulafono.

Malo le usufono, malo foi le lagi e mama i leni taeao i le paia o le Palemene i le afio o lau Afioga i le Palemia o le Taitai o le Maota, faapea foi le mamalu i le nofo a Minisita, Minisita Lagolago ma Taitaifono, aemaise o sui usufono mamalu o le tatou Palemene.

**TULAFONO TAU FAAOFI O LE FAATATAUINA O TUPE  
FAAOPOOPO (NU.1) 2020/2021 – felafolafoaiga faaauau  
i luga o le faitauga faalua – Aso 19**

**FOFOGA FETALAI:** E tolopo Galuega a le Fono Aoaofa i le Aso Faraile i le vaiaso talu ai o lo o saunoa le sui usufono mo le itumalo faaalaalafaga o Faleata Sisifo.

Ae ou te le i tapa lau Afioga i le sui usufono mamalu e faaauau lau saunoaga, se i ou tapa muamua le Afioga i le Taitai o le Malo, le Afioga i le Taitai o le Maota mo lana Saunoaga Faa-Minisita.

**SAUNOAGA FAA-MINISITA A LE AFIGA I LE PALEMIA  
Susuga Hon Tuilaepa Auelua Fatialofa Lupesoliai Lolofietele Neioti  
Aiono Galumalemana Dr. Sailele Malielegaoi**

**Susuga Hon TUILAEPA AUJLUA FATIALOFA LUPESOLIAI LOLOFIETELE NEIOTI AIONO Dr. SAILELE MALIELEGAOI (Palemia):** Lau Afioga i le Fofoga Fetalai, sui usufono mamalu o le Fono Aoaofa Fautulafono, tatou te auai faatasi i le taulaga na e siitia e faafetai ai lo tatou Atua i le soifua lelei ma le lagi e mama na ia taitaiina mai ai i tatou uma i leni taeao fou aua le tatou Fono mamalu a le Palemene o Samoa. Aua le faalagamaea a Tootoo ua faauuina o sui usufono filifilia o itumalo palota, e fofoga ai Samoa i o outou finagalo faaalua aua le tofa tatala, le utauta

mamao aua le fausia o le tatou Malo, le Malo o tatou tagata e tali atu ai i manaoga eseese e atia'e ma siitia ai le soifua au i luma o tatou aiga e ala i galuega mo le soifua lelei o aoaoga ma togafitiga, ua tatau ai, o faamai eseese ua aafia ai tatou. O vai taumafa, o auala lelei i faatoaga, mauagofie le taumafa eseese, ae a le pupuiga mai uiga ese mai fafo e faatupulaia ai pea le moemoenoa ma le laufālēaina ma faapea ane ai upu a Taitai o le atunuu, "A! ua solo le falute, ua mamaioa mamaitaloa le tulai mai o uiga ese i totonu o tatou nuu, e afua ai ona faataua le Fonousu lenei, ua atoa i ai Tupu ma Ee o Samoa i ona tafa eseese, o tupua tausi o Aiga ma Tama, faapea foi le Usoga a Tumua ma Pule. Ae a le faanonogamanu a le aufai tatalo? Mai totonu o le Fono mamalu lenei a Samoa ma lona Malo, e alu atu ai tonufai a le atunuu, e le gata o aoga eseese faapitoa tonu lava na o le nuu, le pitonuu po o le itumalo. A o suiga lelei tetele mo le manuia lautele o tagata uma o le tatou atunuu. E le tatau la ona vaapiapi le vaai taulai a so o se Malo e mataalia a ia lautele foi le vaai mo atinae tetele e faalaugatasia uma ai tagata uma o si o tatou atunuu.

E le gata la i le faalautele o le faataua o atinae tetele ma tonufai a se Faigamalo mo tagata uma o Samoa, a ia mamao foi le silasila i atinae mautu e tumau le aoga. E le gata i tupulaga o aso nei, a o tupulaga foi fai mai o le atunuu e le i fananau mai, e faapei o aoga, iunivesite, o uafu faava o Malo o le lumanai, o malae vaalele, faafaigofie ma malutia atili ai le soifua lelei o tatou tagata femalagaai i aso o suiga matuia o le tau. Ma o mala maoae ua faafeagai nei ma Samoa ma le lalolagi atoa, o suiga matuia o le tau ona ua matua masofasofa le fa, e ui o atinae soonafai e Malo tetele o le lalolagi, ua malepe ai le paleni o le natura na faia e le Atua tatou te soifua saogalemu ai, fiafia, ma a tatou fanau. O uiga maotua ia o lea ua aafia ai foi ma Samoa i afa tetele e le masani ai. O timuga uiga ese le mamafatū ua tatou molimauina i nei ona aso, e ao ai ona oooo i ooooga fuafuaga mamao e tatau ai ona matua tuutuu i le loloto fuafuaga mamao a Taitai o Samoa nei ma ē luā.

I totonu o le Palemene lenei, o fuafuaga e le faataaloga i vai pe faataetaealuga ona faataoto tonufai e tua i ai o tatou tagata lautele i taimi e tatau ai. E ao ai ona faalologo Samoa i le tatala mai o le tofā teumau e ala i a tatou felafolafoaiga e fai i totonu o le Maota lenei ua atoa i ai Samoa. Ua leai foi nisi o toe aisili. O le fefaasoai o manatu e lē milia faauu upu. E oo lava ina siisii ai ma leo, a o aga masani, e matua lava i le oo.

Pe a toe foi i tua se manatu lau Afioga i le Fofoga Fetalai i le 50 tausaga talu ai, e tele suiga lelei maoae ua faatulai mai i le tatou galuega o lo o fai faatasi i totonu o le Palemene lenei, i le siitia ma le faalelei atili o le tatou galuega, o tatou o auauna a Samoa ua tofia tatou te o mai e galulue mo le lelei au i luma o tupulaga i nei ona aso ma tupulaga o le lumanai. Tatou te le faataua ni lelei mo tatou lava. E tuua ai le Fonousu a Samoa ae tatou o e saili o tatou manuia faapito mo tatou lava. Po o le a lava le ta'u, po o le ta'u o faiga faaupufai, e faaoga i ai faatosina.

A o ou galue i le Malo i lou talavou ma ou sau i le valaau atu a Komiti o le Palemene i na ona aso mo le faamalamalamaga o lea atinae ma lea atinae, ma le faatupega, e masani ona ou sau faatasi ma nisi o lau Matagaluega i lea aso ma lea aso e oo lava i le afiafi ma le po. Ou te sau e le o atoa sui usufono o Komiti o le Palemene na valaau atu ia te au e mafai ai ona amata le Fono a se Komiti na valaau atu ou te sau ma nisi o le matou Matagaluega. O Komiti Tupe po o le Komiti foi o Tulafono po o le a lava le Komiti ua faatulafonoina e tuu uma a matou galuega ae o mai i luma o Taitai, o Taitai mamalu o le tatou atunuu, o lupe na faia mai le fuifui e o mai latou te faia tonufai, fai ma le tonu, aua le manuia au i luma o tagata uma o Samoa, ae le mo le latou lava manuia. Pe oo lava i le 2 itula o ou faatalitali a o la e tauvalavalaau se sui usufono e toa-tasi i le telefoni i le RSA po o le Mount Vaea e o maia i le Fono a Komiti o lea ua matou faatali atu, o matou o auauna o lo o galulue i totonu o le Matagaluega o lo o faia le tautua. Matou te o mai i o matou Taitai, Taitai na fili faapitoa mai e o latou itumalo. A o le a le mea lea e fai? O lea e tau sue mai i fale pia. E le o se faataitaiga lelei ia i matou o lo o galulue, o lima taumatau o le Malo, sa aooga i fafo ma omai e toe faafoi mai i tagata o le atunuu aooga sa alu ai tupe a le Malo. E omai le Komiti po o le 2 itula e faasuaava uma lava, ona fai onana ai lea o talanoaga.

Sa i ai foi i totonu o premises a le Fale Fono si tamai faleoloa e faatau ai pia, na iu ina vave tapunia, o lona uiga ua gau. Ae sa ou vaaia foi ma taaiga fala ma aluga o faipule e momoe ai i le po i totonu o potu fono ina ia faapea ai sa fono i le po atoa ina ia tele ai a latou alauni e maua ai. Sa lē laaloa ai le vaai a i latou o le aufaigaluega a le Malo i na uiga, uiga tuai, ua le o toe vaaia i nei onapo.

Lau Afioga i le Fofoga Fetalai, o isi tausaga i Nofoaiga eseese ua mavae atu ae le i tulai mai le HRPP, e tau leai ni Fono a le Palemene e faia. O Fono e maua ai le avanoa e sui usufono e faaleo o latou manaoga. Aisea? Musu Taitai o le Malo i na vaitau e usu ni Fono a le Palemene ina ia leai ai se avanoa e tuuina atu i faipule e faitio mai ai i le Malo, ia pe aumai foi a latou fautuaga aoga, aua o aga ia a Fono a le Palemene lenei, e avanoa ai foi ma tootoo o itumalo e aumai le faitioga ma le tuualalo. E le o se mea e tau faailo lea mea. A lea e faafofoga mai lava le atunuu, o toe finau lava le HRPP, o Minisita faapea foi ma i latou o sui usufono o le HRPP ua filifilia e ave ma Agai a le HRPP lava ia e agai mai le Malo. O se siaki independent check within the Party, e toe check ai lava e le Party lana ia Faigamalo.

Lau Afioga i le Fofoga Fetalai, ou te manatua isi tausaga e na o le tai-tasi ai lava Fono a le Palemene e usu, ona e faamallosia i lalo o Tulafono, e tatau lava ona usu le Fono a le Palemene e pasia ai tupe autu e faatino ai galuega o le tausaga fou faaletupe faale-Malo. E ao lava la ona Fono le Palemene, pe tasi le Fono, e tatau ona fai faamallosia i le tausaga. Ua fiu nai Kalaka o le Maota nei e tauanau ina ia sui, fai suiga, ma e tele foi suiga ua faia e i latou sa nofoia le Nofoa o le Faauluuluga o le aufaigaluega e auauna i le tatou

Fonotaga. Amata mai lava i le amataga i le uluai Kalaka o le Maota nei le Afioga ia Feesago, faasolosolo mai lava lea, tau mai i le tamaitai muamua lava, le Afioga i le Tamaitai Fomai o Toia, faasolo mai ai i isi na mulimuli mai, le Afioga ia Fepuleai seia tau mai lava i le taimi lenei, ma le tele o le mau suiga lea ua mafai ona fai, ina ia matau mai e isi foi Malo faa-Palemene a tatou aga faa-Palemene, o aga ia o Malo e pulea a le Taupulega faa-Temokarasi, ina ia sologa lelei ai le faasologa o le faiga o tonu a le atunuu.

E i ai le isi a matou fonu ae ua ou faipule, e ta le 12 i le vaeluapo ua oo i le aso kerisimasi ona faatoa faamuta ai lea. Na faia ai ma le faigalotu iinei i totonu o le Maota lenei. Aisea? O le malosi lena o le Itu Agai, faipule o le Palemene i le taimi o le tulai mai o Faigamalo Soofaatasi, ua sosoo faatasi nei le taitaiga a Tupuola Efi Tupua ma le matou uluai Taitai o Vaai, ua fai soofaatasi le la Faigamalo e tetee mai ai i le HRPP i lena vaitaimi ma avea ai le Soofaatasi ma Malo i luga o faaiuga fai a faipule, e le i faia i luga o faaiuga fai a le atunuu e ala i faiga palota. Na matou see atu ai i ina ma agai loa le Malo. O se agai matautia, na tau le manifo le Faigamalo, ua matou faaaogaina le avanoa, le avanoa matou te tutulai mai ai ma lu'i le Malo ma aumai tuualalo ina ia faaleleia atili le auaunaga a le Malo. O tulaga taua lea o le nofoaga o faipule, e le o ni Minisita o lo o agaia le Malo.

Nei, lau Afioga i le Fofoga Fetalai, ua tele Fonotaga a le Palemene ua usu nei, ua tele ai avanoa e tuu atu i faipule e sausaunua ai ma aumai a latou fautuaga ma faitioga, ma e aoga faitioga uma e fau ai le tatou Malo. Pe matou te taliaa, ae i ai le aoga o manatu faaalii, o le faalo lena a le Faigamalo i le mamalu o sui usufono o itumalo na tofia e sausaunua, o tootoo o tupu ma ee o tapuai mai i o latou maota ma laoa. Ma na o le Maota lenei e alu atu ai mea moni, mea tonu. Aisea? Aua e faaali loa se taofi e le faavaea, se taofi e taufaasese, se taofi e taufaavalea, o le taimi lava lena e tapa ai loa e le Malo le faamaoniga e tusa ai ma a tatou Tulafono Tumau. E ave loa se taofi po o se tuuaiga e suesue e Komiti Faapitoa ua faatuina e le Palemene ina ia silasila totoa i ni saunoaga ma ni tuuaiga taufaasese ae fai loa le iuga a le Palemene lenei, po o le faatea, po o le faamavae.

E i ai la le faaeteetega o sui usufono i totonu o le Maota lenei e soonafai ai ni faamatalaga sese i totonu o le Maota o le Fonousu lenei a Samoa. A o fafo atu la o le Maota lenei, e le oo atu i ai le malosi o le Maota i ana Tulafono faale-Palemene lea e mafai ai ona fai le taufaasese, le taufaaleaga ma le fomalalo, foua o le Malo, e faatupu ai le vevesi ma le faatautā o tagata o le atunuu lenei i le manatu e talitonu gofie o latou manatu taufaavalea. E le gata i o tatou aiga i fafo atu o Samoa e le o malamalama i uiga o fai nei, e taitaisese ai ma le lautele o lo o faalogologo i talaiga nei e fai i tua atu o le Fonousu a Samoa, a o tatou tagata foi i le tele o nuu i tua, e faapea o ni tagata vaivai, taliagofie ni manatu taufaasese. Paga le papau o ia manatu. Aisea? Aua e le faapena manatu o tatou tagata i tua, e atamamai tele. O lea foi e faalogologo mai latou i felafolafoaiga o lo o fai nei i totonu o le Maota lenei

ma faaalu atu i Leitio ma TV e malamalama ai ma le maofa i tautinoga e fai i totonu o le Maota lenei, ae lauga atu i a latou faatosina o fai nei, i o latou malae ua faafeagai lelei ai, ua ese mamao ma mea na sausaunoa ai i totonu o le Maota lenei. O le a le molimau o ia mea? O le molimau ola lea o le amio e masani ona talanoa ai misaga i le gagana faigofie, o foliga manino ia o le upu, o le tagata e faagutugutulia, tulou.

Lau Afioga i le Fofoga Fetalai, o suiga lelei ia ua i ai nei i le Palemene lenei, o le tele o tatou Fono a le Palemene ua faatulaga ma faatulaga mo tausaga taitasi le tele o tatou Fono. E mafai foi ona usu se Fono ona o ni uiga ua matua moomia ai le tataua ona usu se Fono po o ni Fono faapoopo i tulaga o tatou Fonotaga ua faataoto ina ia aloaia ma pasia i totonu o le Palemene lenei i totonu o le tausaga. O isi Palemene e tai pei o Niu Sila, toetiiti lava fono faalausosoo i le ao ma le po.

O le isi suiga tele ua i ai nei, o le muai usu lea o le Fono a faipule faasamasamanoa e talanoa ai ma latou Ofisa Sili o Pulega o Matagaluega, e faamalamalama maeaea Tulafono o le a talanoaina i le Fonousu a le Palemene i le aso e sosoo ai. Sa le masani ai ia le Palemene lenei. Ma o le taimi lava i aso o lou faatoa tulai mai, e faataoto le Tulafono i le Palemene i le taeao lava lena. Ia ae alu ai lava faasoloatoa ai i nai minute, ona fai le faitauga muamua, sosoo ma le faitauga lona lua, ona alu loa lea o saunoaga. O le faiga sa fai e le vaega lenei, e muamua lava tu le Taitai, o ia ua leva ona i totonu o le Palemene. Ona saunoa loa lea faalauaitete, a o lea e topetope le matou faitau. E uma ona saunoa le Palemia, ae tu loa lona lua ua afa ona faitau le Tulafono. Ona saunoa lea i vaega ua uma ona faitau. E oo atu i lona tolu ua faitau atoa le Tulafono. E oo atu i le toatele a le matou Vaega lea e agaia le Malo, ua malamalama uma le Tulafono. O le mea lena sa matou o mai ai. A o le a le mea lea ua tupu? E ese lava le aso faapitoa e faamalamalama ai Tulafono, ona faatoa usu ai lea o le Palemene i le aso e sosoo ai. E sau loa le Minisita e toe faamalamalama le Tulafono, ua uma ona malamalama lelei sui usufono uma o le Maota lenei. Ae i ai lava sui usufono faufau e le fia auai i le aso muamua lea, ona o lo o i ai le manao. E usu loa le Fono, tu ae loa e faaali lona potu, lona potu moto e tetee ai le Tulafono. O le faapogai lena lau Afioga, o le tutulai atu loa o le Minisita faasao. Ae o le a le leo lea tatou te faalogo ai? Ua le tuu maia se avanoa ia i latou toaitiiti, se i sausaunoa ai, ae sese le mea la e tu ae ai. Na fai faapitoa lava le sese lena ma le malamalama, ina ia taofi ai ona avanoa ai loa lea o le tuuaiga lea. E leai se togafiti leaga i lalo o le la, e fou ma e tasi lava le lagoon mate e pau i totonu o le suauu manogi, ae ono namu leaga ai.

O le isi suiga maoae lelei lau Afioga i le Fofoga Fetalai, o le o i tua o le Komiti a le Palemene, e faamalamalama atili Tulafono. Ua osofaia e se malosi uiga ese, e faavae i le pogisa o le le fia malamalama. O se uiga lelei lea, e le o se uiga leaga le faamalamalama. Ae fai mai isi, ua o i tua le Komiti e tauanau. O le faamalamalamaina e le o se tauanau, ina ia pasia se Tulafono.

A o se faamalamalama i se mataupu e fia malamalama ai, ia i latou o lo o fia malamalama sao. I le faafoeina o Malo o le lalolagi lau Afioga i le Fofoga Fetalai, aemaise Malo nei o le Taupulega po o le Commonwealth. O le faiga lenei faale-Malo, o lo o fuafua mamao i ai ia tatou Faigamalo. O taiala maualuluga e faamasino ai le faafoefoe Malo, o le tulafono sili lea, e faalupe i le gagana Peretania o le good governance. E faa-Samoa ina i upu nei, “O taiala o Pulega lelei. Good governance po o taiala o pulega lelei.” O taiala o faiga pulega lelei, lea e faapalagi, good governance. O faiga foi ia, e tatau ona pulea ai so o se Faalapotopotoga e aofia ai foi ma Faalapotopotoga tau taaloga, po o pulega o Faapotopotoga faale-ekalesia. O le taiala lea o lo o faalupe i le faa-Peretania, good governance po o pulega lelei. E lua tapasa tetele lava, o lo o afifi ma tau ai i totonu, o le faaupuga lautele lea.

O le muamua i le gagana-Peretania, transparency, ia matua manino mea uma. Ua leai se faanunumi, leai se faanunununu po o se faaalatua i so o se faaiuga fai a le Malo, le Palemene po o le Faamasinoga, le Tafatolu lea Fefaatauagai a lo tatou Malo.

O le taiala lona lua i le gagana faa-Peretania, o le accountability. O le faa-Samoa ina, e so o se mea e fai, so o se tonu fai, po o so o se atinae fai, ia manino lelei i le faataotoga o gaoioiga o le a faatino ai, ma le taunuuga o faamoemoe i ai. Ia sosolo i luga o faiga faavae lelei, ma le manino ma Tulafono ua pasia e faafoe ai. A sipa loa le faatinoga, e iloa lelei le na faapogai ma fai loa i ai le sala, ua talafeagai. Pe afai e alu alu lelei le faatinoga, ia iloa lelei foi i latou na faia, i latou sa galulue ma le faamaoni. Ia iloa lelei ma le tau e tatau ona fai, po o le sii o lona tulaga, sii ai ma le totogi, po o le toe faaauau o lana konekarate galue i le taimi e toe faasalalau ai. Po o le tofia mai e toe avea ma faipule o le tagata sa galue lelei i le tatou foi lea matafaioi faa-faipule. Po o le toe faaauau foi, o le tofiga o le faifeau i totonu o se nuu, ina ua uma ai lana faamalologa. E apply le Tulafono lenei i so o se pulega. E faigofie tele ona toe faafoi mai le tagata sa galue lelei, aisea? O galuega e faamasino ai oe, e mulimuli o lo o e mulimuli i le musumusuga a le Agaga o le Atua, i le filifiliga e tatau ona e fai. Na fai mai le saunoaga a le sui usufono o Palauli i Sisifo, le Afioga ia Afoa. E talu ai ona ou auai i totonu e galue i Komiti a le Palemene, ua tele lona malamalama i gaoioiga eseese i totonu o le Malo. E tasi lea sui ou te le i vaai o galue i totonu o le Malo. O lona uiga, o Komiti faa-Palemene, o lona faleaoga lea. Ua siitia ai lona malamalama i galuega faa-Palemene, ma le lavelave o gaoioiga o lo o fai e Matagaluega ma Faalapotopotoga, ma le aufaigaluega toatele a lo tatou Malo, o lo o galulue i le ao ma le po.

Lau Afioga i le Fofoga Fetalai, ma sui usufono mamalu o le Maota, so o se avanoa e faaoga ai le tulaga mamalu o le Palemene o Samoa, e taua tele i le sui usufono. O le sui usufono, e magafagafa. O lo o ia manatua, o lo o matau mai le tapuaiga a le itumalo, i le agaga meemee, ua togi le maa a lo latou sui usufono i le faufausiaina o le Malo o Samoa. Na gasea ai o tatou

tuaa ua sagramaiapouli, ua fai i lagi le folauga. Ua tuu mai i o tatou tauau le tiute e faaaauau, e faaaoga tatau le tofi na tuulima mai, e o tatou itumalo, i lalo o le pule mamalu a alii ma faipule. O lo o faamalumalu i gaoioiga lagolago, uma lava a i latou o vaega eseese o le nuu, o faletua ma tausi, o augafaapae, o saoa, o le malosi o le nuu, o le faafeagaiga taulagi. Ae a le latou faanonogamanu, ia sao i matau lo tatou alofaiva, ia fai mamalu, fai ma le tonu, ia fai foi ma le talitalie la tatou galuega. E atagia ai ia sui usufono o lo o malu pea, maua pea le toovae. Ma o lo o i ai pea le toafilemu o le Atua, e aliali atu i uiga matagofie ia o lo tatou olaga faamatai. O le sua faatamalii, e tova ai le lauliliu faalaau mamafa, o le tofa teumau. O lo o taiala i le soifua toafilemu, o pulega faamatai. O le taitaiina mai ai o lo tatou soifua faa-Samoa moni i nei ona po, mai le fia afe ma afe o tausaga, na o tatou nofoia ai nei laufanua, o le tofi o Samoa mai le Atua. O le vaiaso, lenei, ua i ai le faamoemoe, o le a tali atu ai le Malo, tali maeaea i mataupu uma lava ua faafeagai ma le Kapeneta. E aofia ai ma mataupu na laga mai ia outou saunoaga. Ina ia manino le avega mamafa, o lo o tauave nei, e le Malo ma le Vaega Faaupufai lenei. E le gata i le atinaeina o Samoa, o le puipuiga malu i le malosi ua mafai na tatou maua. E tatou tagata mai faamai oti, o lo o pipisi nei. Ma le gasu o lo o sasaa solo e i latou ua oa i le taivale atu o le atunuu, i auala o le malaia. Ae o lo o mau pea le toovae, o le faamafanafanaga lilo mai le Agaga Paia o lo o i totonu o i tatou uma. E na ona tatou fesili lava i ai, ma Ia aumaia ai le tali lelei i manatu e faavae foi i taitaiga lelei o le tatou atunuu.

Lau Afioga i le Fofoga Fetalai, e faaiu se upu i lenei taeao, i lou toe faatepa o le Maota lenei i se tala e taua tele mo i tatou. E taiala mo i tatou i taimi o faigata. I le augani a le isi tupu, le tupu o Parako, i le Perofeta a le Atua o Palaamo. E fetuu Isaraelu, o lo o savavali mai i o latou laufanua, ina ua o ese mai Aikupito. Na malaga mai ai le Perofeta e tali i le fanoga o le tupu e sau e fetuu le nuu o le Atua. Na tietie mai i lana asini, te i lava ua tu le asini i le ala, sasa ae le gaoioi lava le asini, toe sasa, na iu lava lea ina soso i tua le asini i le pa. Ona faapau ifo ai lea o le asini ua le lava, ua tigaina i le sasa. Ona faapea lea o le upu a le Perofeta, “a na ia te au se pelu, ua ou fasi matea nei oe.” Ona faagagana ai lea e le Atua o le asini. Na tautala ai lea o le asini, “o le a le mea ua e faapea mai ai ia te au? Tele aso na ou auauna ai ia te oe. A o le a lenei upu soona fai ua e lafo mai ia te au?” Ona faamatala ai lea e le Atua mata o le Perofeta, ma pupula atu, o lo o tu mai le agelu ma le pelu afi. Na fai mai le agelu, “sao lelei le asini, o le asini ua e ola ai, na ou faaali ai, a na sau pea lau solofanua, ua ou taina oe i le pelu ma e oti ai, pe a na sau pea le asini.” O lea la, leaga o lea ua fia lau tonu e te alu. E faapefea ona e alu e fetuu le nuu o le Atua? O le nuu ua faamanuia i ai le Atua. Ia sau ina alu, a o le tala a le agelu. “Ou te avatu upu i lou gutu, e te tautala ai.” O lea la ua alu le Perofeta a le Atua tu i le mauga, faatasi ai ma le tupu. Na tilotilo atu i le pefu o le savali mai, o tagata Isaraelu, 603,000, aofia ai ma latou

asini, o kamela. O lea e aumai ai uta o latou meafale. Ona osi loa lea o le taulaga, ta fasi manu e susunu i le Fatafaitaulaga. Ona sau loa lea tu loa o le a fetuu le nuu o Isaraelu, e matala atu laugutu, ae sau upu, o upu nei. “Ia outou manuia.” O ai se na te faamalaia le nuu o le Atua ua faamanuia i ai le Atua. E taua tele upu ia i le taimi lenei ua i ai lo tatou atunuu, i le tele ma le tele o le tau faasese.

Ae ou te manatua ai foi ia upu a le auauna a le Perofeta o Elisaia. O lea e moe i totonu o lona faleie i le taeao ua usu ae ai lana auauna e fufulu mata. Ae pupula atu ua lio latou e le fili, e lata i le 100,000 pe sili atu foi. O au a le fili e o mai e saili le Perofeta e fasioti. Ona tatalo ai lea o le Perofeta ma faapea atu, “Le Atua e, faapupula i lau auauna mea e na te le o vaaia.” Ona pupula ai lea o mata o le auauna, ma le pupula atu, i le afe ma afe o kariota afi, o lo o lio mai tua. O kariota afi a le Atua e puipuia Elisaia ma lana Perofeta ma lana auauna. O le a le mea na tupu? E toatasi lava le agelu na ia faia le lata i le 100,000 o le fili. Lau Afioga i le Fofoga Fetalai, ma le mamalu o le tatou Maota. O le a le feau lea e molimoli mai e tala nei taua o le Tusi Paia? O le faamafanafanaga, aua le fefefevale, e le tuulafoaia e le Atua le Malo, le Palemene na Ia filifilia. Lau Afioga i le Fofoga Fetalai, e le tuulafoaia e le Atua. O le a le tele o le taufaaleaga e leai se mea tatou te popole ai, ia lafo i le Atua. O le faamafanafanaga taua tele mo tatou aiga, o lo o nofo mamao mai i fafo, latou te le o iloa uiga o tagata latou te faia ia ni upu soona fai. O upu e soli ai le vatapuia ma le filemu o le atunuu lenei. Ma o le tuualalo ia i latou, ia toa pea le tai. Ne i tei ua outou fetaai i fafo, ona tipoti mai ai lea o outou, i uiga tau faasese o lo o fai nei. O le tatou tiute lea o tatou o taitai, tatou te tutu o tatou o taitai. Ia tausolomua ia i tatou ona i ai le onosai, le filemu o le Atua, ina ia maua e Samoa le filemu. Ma o Afioga a lo tatou Alii, e leai se Malo e tumau, pe a fevaevaeaina.

Lau Afioga i le Fofoga Fetalai, o le faaiuga lena o lau tautalaga i lenei taeao. Soifua ma ia manuia le tatou Fono.

*Na faaalua le agaga fiafia o le Palemene i le patipati o latou aao i le maea ai o le Saunoaga Faa-Minisita a le Palemia.*

**FOFOGA FETALAI:** Ia malo malele ua malo foi saunoa i lau Afioga i le Palemia.

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai, e faatu atu le lafo, *E faataatia i le Laulau-a-Fono le Saunoaga a le Palemia.*

*Faaluaina e le sui usufono mo Aleipata Itupa i Lalo.*

*Na faamaonia le lafo.*



**FOFOGA FETALAI:** O le a faataatia i luga, leaga o le saunoaga faa-Minisita e faataatia ai i luma, ae faafetai o lea ua faatu mai le lafo, ina ia faia ai le finagalo o le Palemene. Malo faafetai, malo malele e le toe tau faia la i ai se upu, pe ou te tau laeia faamaa osofia e fai ai ai o le taulafoga. Ua lava ma totoe le saunoaga a lau Afioga, e faapena ona faalototele ai le tatou Palemene. Tatou te faamoemoe i le Atua. A au le Atua ma i tatou, ia o le a la se isi malosi. Ia tatou faavae mea uma i le alofa, e i ai lona filemu, e i ai le onosai.

Ua faafofoga le Palemene ua faafofoga foi le atunuu, ae o lea ua oo mai le taimi o le saunoaga a le Afioga i le sui usufono mamalu mai Faleata. E tapa lau Afioga i le sui usufono mo Faleata i Sisifo, e tulai maia e amata lau saunoaga.

**Tofa LEALAI PULE RIMONI AIAFI (Faleata Sisifo):** Sa ou faapea se i foi mai le tatou inugati i le taeao. E faigata foi le sosoo o le lauga a le Taitai. Ae ui i lea, o le a tali lou finagalo, ua leva ona gasea, aemaise o le fia faafofoga mai o Samoa i le lauga a Faleata.

Faafetai i lau Afioga i le Palemia i lenei taeao matagofie ma lau lauga faamalosi. Ae o aso faapenei i lou lava tagata, e ese lou fiafia i ai lau Afioga i le Fofoga Fetalai. Aua o aso nei tatou te iloa ai, le tagata o lava le faatuatua, e le te'i vale, e le soona gase i aso faapenei. Ae faafetai i lou taofiofi iumaea aua le mamalu o Samoa ma lana Palemene. Aua o lau tala lava lea o lea e fai i ou aiga ma tagata. Ou te le selu atu, o le tala e moni. Lau Afioga i le Palemia, le Taitai o le Malo. Ua uma luitau uma o le lalolagi o faa-tofotofa ai oe ma tatou uma. E leai se mala faale-natura, na oge le atunuu lenei. Ua tatou foi mai ai, ua e foi mai ai. Ua e toe aumaia Samoa i lenei taeao matagofie. Na ou ala i le taeao fai le ma lotu ma si ou toalua. Ou fai atu, sole, leaga le atunuu manuia, e moe i le fiafia, ala ae i le malosi faafouina mai le Atua, e le popole i se mea. I le alofa ma le agalelei o le Atua i lenei atunuu manuia o Samoa. Lau Afioga, e fiu lava e tauaveese i lou mafaufau lenei mea, ae faafetai o lea ua saunoa i ai le Taitai o le Malo. E le toe oo foi sau tala i ai, i le vaega lea, vaeane o latou...E leaga o le Palemene lenei, e i ai nai tagata ua maliliu. Ua o faafia i le palota e le maua se avanoa e sau ai i le Palemene o Samoa. Ae a lenei avanoa faaauro ma le faatuatuaga o itumalo, ua ave i nisi o sui usufono? Ae le amanaia. E le amanaia, manatu mama i le Maota ma le Fonousu a Samoa. Ae amuia latou, a o nai isi tagata faigaluga a le Malo, e tasi lava le aso e misi e leai se faanoi, faanoi sese, leave without pay, e le totogia. Ae a sui usufono nei? Ae ui i lea, o le a le toe alu i ai sou manatu. O le a lauga Faleata.

O le lauga a Iuli e lua ao lua po, o le lauga a Faleata e tuusaunoa i le Maota. Aisea? O lea ou te tau malae, e puipui le Fonousu ma le Maota o Samoa. Ae ou te le i lauga lau Afioga, e na o sina minute lava lea e tasi, se i fai sina au tala i si ou tina, ia mama. O se uluai taimi lenei 15 tausaga talu ona ou lauga

i le Palemene lenei, e le o tapuai ma faalogo mai. Aua e muamua lava ona ou valaau pe ou te oso i ai i sana faamanuiaga ae ou te le i sau. A maea foi, ou te valaau faafetai i ai. E fai mai le tala, ina ua amata ona ta le faatagata tele lea e i Amerika, statue of liberty and enlighten. O le faatusa o le saolotoga ma le malamalama, e le alii tusi ata o Falani, Buff Holding. Sa agai ane i ai tamaitai lalelei o Farani, tamaitai tautaua se i saili se foliga e ta i ai le faatagata. Ae peitai, na iu lava ina filifili e le tama foliga o lona tina. E manatua o le faatagata lenei e 20 tausaga na ta ai. Na fai mai a ia, aisea o le a filifili ai se isi foliga, ae le filifili foliga o lou tina, o foliga lelei ma foliga alofa, e tumau ia te au i aso uma. O foliga o lou tina, e ta mau ma ta faatutusa i lou mafaufau ma lou tino atoa, seia oo foi ina e maliu oe. Mama has been and will always be my statue of liberty and enlightening my world forever. Aua sa ia totoina le fatu o le malamalama i o matou loto ma mafaufau, sa ia faasino ma tau maia ia i matou le olaga faataitai. A true reflection of woman in leadership. E mai lona vaivai ma lana galuega faatauavaa sa ia fausiaina ai se aiga mautu ma le malosi. Na fai ia ma matou malosiaga ma maluapapa i le tele o taimi. E moni ai le upu, “Tatou te le mafai ona vaai i foliga o le Atua, a o foliga faamaoni ma le alofa o le tina, o foliga lava ia o le Atua.”

Sa fai lau tala i le laugatogi a le Kolisi o Samoa. Sa tau faavasega e lou mafaufau le upu lea a le Tusi Paia, “O le tama poto e fiafia ai le tama, a o le tama valea e faanoanoa ai le tina.” Peitai, na ou toe mafaufau, so o se tamaitiiti lava, faatoa vaai lava i lona tama ina ua 9 masina, a o le tina, mai lava i le uluai aso o le olaga. O le uiga la o le fuaiupu i lou talitonuga, o tama, po o le tele lava o tatou tama, e pei e fiafia lava pe a poto ma lelei le tama, le atalii po o le afafine. A o le tina, pe valea, po o le a le ituaiga mea e oo i ai, e alofa lava i ai. Mama, ou te le i faia lava le tala lenei e fai soo e tagata i aso maliu e faapea, ia manuia lau malaga. Aua ua ou talitonu ma le faamaoni, ua e i ai i lou Matai, aua sa e tau le taua lelei, ua iu i le manumalo lau tausinioga. Aua ua e alu ae tuuina mai le tele o augatupulaga e faaauuina lou talaaga. If I have left with so much satisfaction, knowing you ran your race with grace dignity and honor, and you have left behind the legacy of generations that will continue to write your story. O lau fautuaga i tupulaga o Samoa, tausi fiafia outou matua, na pau lava lena o le life insurance e guarantee ma mautinoa.

Ona faaiu atu ai lea o au upu lau Afioga, e momoli atu le faafetai tele i sui usufono mamalu uma o le Palemene na alolofa atu i le aso o lo matou tina. Pau lea o se maliu toetiiti o atu uma le Palemene, ua oo lava i sui o le FAST, sui o le Tautua. Ia, o le polokiki lena a le Samoa. Tatou te feeseeseai i talitonuga, a o tatou lava e tasi. Na pau o le mea, o faamanuiaga a lenei sui usufono, ia manuia le alo atu i le palota. Aua na iloa loa e le loomatua ua leai sau palota, alu fiafia loa.

Ia, ua le lelei lau... o le tele o le ula, o le tiumasalasalala a si ou uso na aumai ou te faaaogaina i lenei aso, le Salelesi, faafetai. Na pau lenei o se ula taugata ua ou ulaina, e \$300 le tau.

Lau Afioga i le Fofoga o le Fono, lau Afioga i le Taitai o le Maota ma lenei Itu tele o le Pulega o le Malo, i le afifio o Minisita ma Minisita Lagolago. Lena Itu o le Malu i le afifio o Taitaifono ma Sui Taitaifono o Komiti Filifilia, sui usufono mamalu o le Palemene. O le atoa lio lea o le Maota o Samoa, vaeatu le faafofoga mai o Samoa i ona tulaga faalupe.

Afifio foi Taitai ma Ofisa Sili o Pulega o Matagaluega a le Malo, aemaise le Ofisa o le Fono.

Ae ua ou tulai ma le ava tele lau Afioga i le Fofoga o le Maota, ia se i fai se tala mulimuli a lenei itumalo o Faleata Sisifo mo le Paeaiga XVI o le Palemene o le Malo Tutoatasi o Samoa. A o se uluai tala foi a le itumalo o Faleata Nu.3. O se tala mulimuli aua ua vaetolu lenei itumalo, ae le o se faanoanoaga, a o se moemitiga na tulituliloa e lou nei faatauvaa, ae o se suiga ua faatinoina e le Malo e tusa ai o ana faiga faavae.

Ae o sa taputapu o lenei Maota, faapea paia ma mamalu o Samoa, taoto ia sa o le vaosa o Aloaii ma le paepaesa o Tupu, e le auga lou faatauvaa ma lea maualuga. Ae o paia foi ma mamalu ma ee tapui i saunoaga ma fetalaiga o lenei Maota, e le toe fia aapa i ai sou naunau aua o sa ma paia ua taoto i le agatonu. Ae taoto ia le vaatele o le sa folau ua mau lalago ma lalago mau, aua ua usua le Fonousu a Samoa i le malae o le faugatia, o le malae o le tagatia ae o le malae o le faalelegatia a Samoa, e tasi lona manulauti, ia manuia ma filemu Samoa.

Ae si ou itumalo Faleata Sisifo, ia tapuai maia ma le manuia, o se taimi ou afe atu i lau tapuaiga, aua o lea ua pale i fanua lenei Paeaiga, ae manatua i le loto lau faaaloalo maualuga.

Lau Afioga i le Fofoga o le Fono, ua fofoga lo tatou Atua i le tatou faafetai, ae le uma le loto faafetai. Aua a tatou tepa i tua i le savaliga o le 5 tausaga o lenei Paeaiga, e maeu Lona agalelei, aua sa Ia taitai ma tauave mai le soifua o lau Afioga ma sui usufono mamalu o lenei Maota i Ona aao alofa. E ui foi i Lana valaau paia ua afetualaina ai le tatou malaga i le amataga o lenei tausaga, i le tuua o le Malo e le uso a faipule le Afioga ia Vaafusuaga, ae o le soifuaga, ua maea tuumatamaga e lo tatou Atua, o le taeao o le tautogotogo ma le afiafi o le taumagumagu ma le avanoa tatou te toe feiloai ai i le taeao o le aso fou ua saunia e lo tatou Atua e alafai ai le au faatuatua o momoe. E fia faaopopo ai faamaisega a lenei Maota i le faletua ia Vaelaa ma si ona afafine, faapea le aiga ma le itumalo. Talofa ia Vaafusuaga ua tuua ma le alofa ma loimata, ae faafetai i le Atua i lea auauna. Tau ina agalelei le Atua i le faletua ia Vaelaa ma le afafine ia maua le faamalosiua e faaauau le malaga. Ae, Vaafusuaga, faafetai i le ta mafutaga. O oe o se uso faamaoni ma le alofa, e le galo oe. Sa i ai lava le naunau e fai sau molimau i le aso o

le uso, peitai ane ua le maua le avanoa. Ae faafetai, faafetai foi i le aiga, ua matagofie le tatou faamavae atu i le uso.

Lau Afioga i le Fofoga o le Fono, e ese le malie o le gagana Samoa. O le tele o upu, e le lelei ma le malie, e amata i le F, a o upu foi e aupito sili ona lelei ma taua, e amata foi i le mataitusi lea o le F. O le faataua lava lea na tatou amata ai o tatou laiti, o le F faafetai ma le F faamolemole. A e manao i se mea faamolemole, a maua mai, faafetai. O lauga uma foi o lenei Paeaiga ma le tatou Fonotaga mulimuli, e amata lava i le faafetai, faamalo, sosoo atu ai ma le faamalosiau, o le faufautua. Ae ua ou manatu, ou te fia faaaogaina le F lea na faaoga e faaiu i ai galuega a le Faaola i le lalolagi nei, F fealofani - unity. Ua silafia lelei e le Atua, o le Tulafono aupito sili lea, aua o le fealofani e fanau mai ai mea lelei uma. A leai se fealofaniga ma se tuufaatasiga, e leai se faamanuiaga. No unity, no blessings. Aua o le fealofani, e fanau mai ai le tutu faatasi. O le tutu faatasi, e tupu mai ai se Faigamalo lelei ma mautu. O le Faigamalo lelei ma mautu, e fua mai ai se atunuu toafilemu. O se atunuu toafilemu, e ola fiafia ma saoloto ona tagata.

O le fesili la; ua mafua i se a ona tatou maua se Faigamalo mautu ma se atunuu toafilemu? E faigofie lau tali. Ua tatou maua se atunuu saoloto ma ola fiafia ona tagata, ona o le mautu ma le lelei o lana taitaiga. O se Faigamalo mautu ma toafilemu, e fanau mai i se taitaiga ua mautu ma malosi. Stable government and a peaceful country is a product of sound and stable leadership. So o se Faalapotopotoga o i ai le fiafia ma le filemu ma le sologa lelei, e muamua lava fesili; o ai o taitaia? O ai o i ai i le faafoega? Aua foi fai mai le upu a le Tusi, “E afua mai mauga le manuia o le nuu.” O ai la taitai, o ai taitai ia o lo o faafoea le sa o Samoa? O lau tali i lau Afioga, o Taitai o aiga, Taitai o nuu, Taitai o Ekalesia, Taitai o pisinisi, Taitai o Matagaluega ma Faalapotopotoga a le Malo, Taitai o le Faamasinoga, ae faamatua le tuu i le Taitai o le Malo ma lana Palemene. Aua e maopoopo aiga ona o matua po o Sa’o. E faia le tiute o matua ma matai o aiga, ona o le lelei o le taitaiga o pulega a alii ma faipule. Lelei pulega a alii ma faipule i le galuega faale-agaga a Auauna a le Atua. E mautu ma malosi le taitaiga o le Malo ma lana Palemene i le tautua matavela ma le lagolagosua a Ofisa Sili o Pulega o Matagaluega a le Malo. Ua faigofie taitaiga o le Malo i le galulue faatasi ma pisinisi. Ua mautu taitaiga a le Malo i le tuuina atu o le tutoatasi e faatino ai galuega o le Faamasinoga. O itutino nei o lo o galulue i le ao ma le po i le faafoeina o le sa o Samoa. Ae ou te talitonu lau Afioga, o le atoatoa o nei taitaiga uma, e i ai ona mafuaaga.

O le mafuaaga muamua; o le tausisi o o tatou Taitai i lona faavaepapa ma le matatau o tatou Taitai i le Atua o Samoa ma le lalolagi atoa. Faafetai le lototetele ma le mataala o Taitai o le Malo ma i tatou uma, ua le faia ai na o faaupuga, ae ua tamau i totonu o le Faavae.

Mai le 55 tausaga talu ai, sa i le faavaa, na o le tatou pepese ai, ae leai se malosiaga faale-Tulafono tatou te taua ai i le lalolagi atoa o Samoa o se

atunuu kerisiano e Faavae i le Atua soifua. I le tausaga e 2017 sa teuteuina ai le Faavae ma tuu loa i totonu, o le mataupu muamua lava – “O Samoa, o se Atunuu Kerisiano e Faavae i le Atua le Tama, le Alo ma le Agaga Paia.” O lona uiga, e moni sa taua o tatou o se atunuu e Faavae i le Atua, ae le i manino po o ai le Atua. O lea tatou te iloa ma sa mautinoa e nai o tatou matua ma tuua, ae le o faapea mai le Faavae, o le Atua le Alo ma le Agaga Paia. O lona uiga, i le 55 tausaga talu ona faavae le sa o Samoa, sa i ai lava le avanoa e fai ai so o se Ekalesia i Samoa, e pule lava latou i le latou Atua aua e le o manino i le Faavae.

O le uiga o lau tala lau Afioga i le Fofoga Fetalai, a tatou vaai i le tele o atunuu taulalata mai, tuuaia le lalolagi tele, atunuu lalata mai pei o Fiti, Niu Sila, Ausetalia ma isi atunuu o le Pasefika, ua taua nei atunuu nei o atunuu faale-lalolagi, circular states. E le aiaina e talitonuga faale-lotu Faigamalo ma pulega faale-Malo. Aisea? Ua tele Atua, ua tele talitonuga faale-lotu. Ma o le mea mautinoa, e oo i ai tatou pe a na le mataala ma lototetele tatou e tamau i le Faavae leni suiga.

**FOFOGA FETALAI:** Ia, ou te faamalulu atu i le sui usufono o lo o saunoa, masalo e le faigofie le faauilavea ona o le manaia o le saunoaga, ua fia faafofoga mai foi le atunuu. Ae ui i lea, e i ai le manatu e te tofomalie e faaauau lau saunoaga pe a tatou taliu mai i le tatou malologa masani ona faaauau lea o lau saunoaga matagofie.

Ae mo le taimi nei, ou te faasilasila atu ua faataatiaese Galuega a le Fono Aoaofa Faitulafono mo lana malologa masani. Faafetai.

*Na faataatiaese Taulumaga a le Fono Aoaofa Faitulafono mo lana malologa masani i le itula e 10:45 i le taeao ma toe faaauau i le itula e 11:35 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

Ia, e manatu ua faaopoopo le malosi i le paia o le Palemene e faaauau ai le tatou Galuega. E faia le malologa o lo o saunoa le Afioga i le sui usufono mamalu mo Faleata Sisifo.

Ou te tapa ma le faaaloalo lau Afioga Lealailepule lau Afioga i le sui usufono mamalu mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga i le Fofoga Fetalai ua maua foi se avanoa e toe maua ai se faamalositino ma faaauau ai galuega a le tatou Palemene. Faafetai foi mo le tatou malu taeao i lenei aso. E ui lava ina faailoga le lauga a Faleata i le tatou kopai koko, ae le afaina. Matou nonofo ma Sala ma Lopaoo, ia aumai e si vaega lau kopai, ou fai atu i ai, “Malie lua Afioga, tausasami oulua, o mea ia sa ou ai i aso ia o 5 ou tausaga, ua ou le toe ai ai i lenei vaitaimi.” Faafetai mo le faaaloalo. Ia, o nai mea foi ia tatou te mafaufau ma tatou toe ai. Ua iloa foi le aganuu a Samoa lau Afioga, sa fai koneseti foi ia a nuu e ta ta solo, mea o faleaitu, o i ina e momoli ai feau, momoli ai feau foi lele aua le nofo filemu o nuu, ma maua ai paolo ma gafa fetalai solo. O le taimi foi la lenei e amata ai mea faapenei foi lele lea e fai ma tova i nai upu e maua ai le tatou loto fiafia.

**FOFOGA FETALAI:** Faafetai. E pei lava o lau saunoaga, e le taua taumafa ae taua le mafutaga fegalegaleai ma le nofo fealofani. E le o le tulaga lea. Ioe. Ae, malo faafetai. I le faafofoga mai foi a Samoa, ia o a ni taumafa o tatou... aua o le fesili lena po o a ni taumafa o fai e le Palemene. A o le mea sili o lea ua avea lau saunoaga ua faafofoga mai ai Samoa, ia, o le kopai, a le o le kopai o le koko araisa. Ia ae le taua taumafa, ae taua le tatou mafutaga mafanafana, mafuta, aua o le fetalai lena a Iesu i ona au soo, “E iloa o ou soo outou pe a outou fealofani.” Ia, tulai mai le sui usufono e faaauau le saunoaga.

**Tofa LEALAILEPULE RIMONI AIAFI:** Faafetai i lau Afioga. E leai, faafetai. E pei ona avatu lau tala, e ese le taua o le kopai i lenei aso, faatoa ou toe ai lea i ai talu mai le 40 tausaga talu ai. Ia ae manatua foi, ua e saunoa, o le fetalai a le Atua, Iesu i ou soo. Fai mai Solomona, “E leai se mea fou i lalo o le la lenei.” Ae fai mai le fetalai a le Faaola, “O se ua ia te Au, o le tagata fou lea.” A o le tagata ua uma ona feuiaina e le agaga, ua fanaufouina. Lea na ou tautala ai ae le i faia le malologa lau Afioga, i le mamao o le tofa ma le loloto ua faamaufaaailogaina ai ma tamau i totonu o le Faavae o Samoa lona Atua ma lona talitonuga faa-Kerisiano, ua taua ai nisi o atunuu lalata mai. Sa amata uma lava Palemene a nuu nei i le tatalo i le Atua, ua le toe faaauauina. Ua oo i aoga sa fai ai le tatalo a le Alii, ua faasa e isi atunuu ona toe fai. Talofa! Ae le i faia le osofaiga foi lea i Amerika a tagata ia o le atunuu, sa fai ai le tatalo e le isi Senate ma tatalo ai lana tatalo e amata ai le fono a Amerika, ae faaii lana tatalo, fai mai, “Amen and awomen.” Ua pei ua ula, pei se mea ula. Ia, o mea ia o lea tatou te puipui ma liolio i ai aua Samoa ma lona agai i le lumanai.

Talu mai la i le 2017 ua avea nei Samoa ma atunuu kerisiano atoatoa mo se uluai taimi e tusa ai o lona Faavae. A Christian Nation as stipulated by her Constitution. O le uiga loloto o lea mea lau Afioga, e matua le toe taliaina e Samoa se isi Atua po o se isi talitonuga e ese mai le faa-Kerisiano. O a foi

Tulafono e aumai i totonu o le Palemene, e le toe taliaina ni Tulafono feteenai ma lona talitonuga faa-Kerisiano. Ou te matua faafetai ae ai i lenei suiga maoae ma le lelei. A lea ua tatou molimauina lau Afioga? E leai ni a tatou punaoa faale-natura, e le maoae foi so tatou tamaoaiga, ae leai se isi punaoa e sili ae i punaoa o lo o Faavae ai Samoa, o le afuaga o manuia uma. E pine faamau, e le o mafai e tamaoaiga tetele o atunuu mauoa o le lalolagi ona tali atu i le faamai o pule sau nei i le lalolagi. Ae o Samoa, o le atunuu faamanuiaina, ona ua mautu lona Faavae.

Ona ou oo mai lea lau Afioga i le isi mafuaaga e lua ai mafuaaga o le mautu ma le toafilemu o Samoa. O le isi mafuaaga ua mauaa ai lo ta Faavae ma le ta Faigamalo, ina ua mafai foi e lenei Paeaiga ona faamautuina i totonu o le Faavae le ta aganuu, o le ta tofi mai le Atua. Mai le 58 tausaga talu ona tutoatasi Samoa, lea faatoa aloaia mo le taimi muamua ma tamau i totonu o le Faavae le aia tatau o pulega a alii ma faipule, pulega mamalu a alii ma faipule, o le ta tofi lea mai le Atua. Sa ave le faamuamua ma le faataua i aia a tagata taitoatasi, a o lo ta tofi mai le Atua la ta aganuu o lo o maua ai le ta toafilemu ma le fealofaniga, e le i i ai sona tulaga i totonu o le Faavae. Faafetai i Taitai o le Malo, tatou uma, sui usufono mamalu o le Palemene. E le o ni manatu mai se tagata nei manatu ma lagona. Aisea? O le Taitai e ola le faatuatua e tautuli i le ao ma le po mo le musumusuga a le Agaga Paia. Lona uiga, ua mafai nei foi mo se uluai taimi ona i ai se avanoa e faaaogaina ai le aia tatau a alii ma faipule pe afai o lo o sao ma talafeagai, ua tutusa ai nei ma aia a tagata taitoatasi, ma aia a nuu ma afioaga. A i ai se feteenaiga, o le a aumai i le Tulafono e avatu ai le faaiuga i le aia e maua ai le toafilemu ma le aia o lo o sao.

Ina ua maea la nei suiga tetele i le Faavae, o le taimi muamua lava i lou talitonuga lau Afioga i le Fofoga Fetalai ma le Maota o Samoa, lea ua atoa tino o le tama i totonu o le Faavae, aemaise Faigamalo Temokarasi a Samoa. Ua tu matila ai nei Samoa i lona Temokarasi e talafeagai tonu ma lona siosiomaga ma lona olaga i aso faipea. Ua o faatasi ai nei lona talitonuga i Faigamalo ma lona talitonuga faa-Kerisiano faapea lana aganuu. Ma i lou talitonuga, ua patipati fiafia o tatou tuua na tusia le ta Faavae aua ua tau lau o le latou faamoemoe.

Lau Afioga i le Palemia ma le Faigamalo, e tele taimi, tele suiga lelei ua tatou faia, ae o le suiga lenei ua laualuga ai le tele o galuega lelei, leaga o le Faavae e le soona lotea, ae ua e tago tonu lava i le fatu o le siosiomaga o Samoa i aso faipea, o lana aganuu ma lona talitonuga faa-Kerisiano. Fai mai le isi toeaia ua iloga lana tautua ia Samoa i le Palemene ma le Malo, Afioga ia Feesago Fepuleai ina ua atoa le 50 tausaga o Samoa, “I hope that whoever is chosen to the position of Leadership, holds fast to the principles that held us together 50 years ago. O lou faaunautuiga, o ai lava o le a tulai mai e Taitai Samoa, ia o latou taofimau i itu taua ia sa uumauina ma tuufaatasia e le atunuu mai le 50 tausaga talu ai.” I lou talitonuga, o mea ia e lua, mea ia

sa tuufaatasia e tatou mai le amataga e oo i le faavavau, le tatou Kerisiano ma le ta Aganuu, o lea ua amanaia ma tuuaofai i pulega faale-Malo.

E pei ona ou talanoa atu, e le o se mea tupu faafuasei lea mea. O Samoa, na taiala i le Pasefika i le tele o mea, i lona Tutoatasi, o lea foi ua toe taitai Samoa i le Pasefika ma le lalolagi e ala i le tuufaatasia o mea taua nei i lona Faavae. E momoli atu ai le faafetai tele i le tatou Malo.

Ona ou oo mai lea lau Afioga se i fai sau tala i le tamaoaiga o Samoa talu ona ou ulufale mai i le Palemene. E 15 tausaga talu ai ou ulufale mai, ia ai lava na o se Samoa se i tulou e leai ni ona fofoga ona le talitonu lea ma vaai i le tulaga o i ai Samoa i lenei vaitau. Fai mai le loomatua o le matou aiga faatoa foi mai sa i Amerika, 20 tausaga e le i oo mai i Samoa, “Sole, se a e alu atu faafetai i le Malo, matua sese nei tala e avatu i fafo. Ia vaai o lea ua ou i tua nei i le tatou nuu i tua nei, a ou fia alu i le lotu vili lau taxi lea e tu mai sau momoli au, ma foi mai ma tutu i le faleoloa, e maua uma ai lava oloa la e maua i Apia ta te le toe tau alu i Apia, ou foi mai ki lau TV, tele ituaiga channel eseese. Ou manao i se tupe vili lau fanau.” Fai mai lau fanau, “Vaai lau telefoni lena ua i ai le tupe i totonu.” Maoae nei suiga lau Afioga, maoae nei suiga ua tatou oo i ai. Ou te oo mai i le Palemene pei ona taua e se tasi o sui usufono matua o le Maota, o taua tatou o atunuu vaivai le tamaoaiga, Least Developed Country. Ua lata nei i le 10 tausaga talu ona siitia maualuga le tulaga o le tatou atunuu, avea ai o se atunuu ua lelei ma mautu lona tamaoaiga, developing country. O faamaumauga na lau Afioga, e le tetele ma e le mafai ona natia pe alofia, fua i le tamaoaiga ma le olaga o tagata i aso faipea. A e manao e te tilotilo pe e te fia iloa le tulaga o i ai se tamaoaiga o so o se atunuu o le lalolagi, e i ai mea o fua faatautau, e i ai mo mea o faailoilo po o indicators. O fua faailoilo ia, o i ina e tau mai ai le tulaga o i ai se tamaoaiga o so o se atunuu. E laugatasia uma lava atunuu o le lalolagi po o fea e te alu i ai. O vaega ia muamua tilotilo po o a mai lona tamaoaiga tau tupe, le GDP. E tilotilo po o a mai ana tupe faagaga mo fefaatauaiga ma taimi po o vaitaimi nei e afaina ai le tamaoiga lautele o le atunuu, foreign reserve. O tupe faagaga mo fefaatauaiga, tatou te tilotilo i le mortality rate, po o le aofai o pepe ua mafai ona aulia le 1 tausaga o soifua pea. E tatou te tilotilo i le life expectancy rate, o le uumi e mafai ona soifua ai tagata o lea atunuu. E tatou te tilotilo i le tulaga o i ai ana tagata faigaluega, po o le a le tulaga o i ai. O mea nei lau Afioga, o lea o le a faalauaitele i sau faamatalaga, o mea ia e te alu atu e tilotilo i ai muamua. O i ina la e fua i ai, le tulaga o i ai le atunuu so o se atunuu, po o le a le tulaga o mea nei. E le gata i le ola soifua maloloina o tagata, a o le tulaga o i ai lona tamaoaiga. O i foi la, e fua i ai e tagata faipisinisi ia mai fafo, le fia o mai e fai ni a latou pisinisi Samoa. Po o se atunuu toafilemu Samoa, po o se atunuu o lo o i ai tulaga lelei o mea nei. O mea foi nei o faamaumauga e fua i ai meaalofo, ma fesoasoani a atunuu mai fafo. I le tamaoaiga lautele, e GDP, e talitonu o le a mamafa i ai se saunoaga a le Minisita o Tupe. Ae na ona ootoo atu o nai



vaega ia, ou te oo mai le 2006, e na o le \$1.5 piliona. E oo mai i le 2015 ua \$1.9 piliona. E oo mai i le tausaga na mavae atu nei, 2020 ua oo i le \$2.2 piliona. O lona uiga o lo o agai pea i luga le tamaoaiga o Samoa. A tatou tilotilo i tupe faaagaga nei mo fefaatauaiga foreign reserve, e na o le 2 tausaga ia e fia aumai. O le 2019 e oo lava i le 6.2 masina o mafai e a tatou tupe faaagaga nei ona faatau ma aumai a tatou oloa e ola ai tatou, ia Tesema i le 2019. E oo mai i le 2020 Tesema na mavae atu nei, toetiiti lava 12 masina e mafai ona cover e tatou tupe ia faaagaga. O se taimi muamua lea ua tupu ai se mea faapea talu ona tatou tutoatasi. Sa ou toe fesili lava i le Faletupe Tutotonu na aumai ai fuainumera, po o sao nei faamaumauga. Ae le masani ona tupu ai, aua e tasi lava le mea e alu ai i luga le foreign reserve, o lona uiga ua le faia ni tatou oloa mai fafo, faaitiitia, pe ua faaalu le tele o tupe a tatou. Aemaise ai le tupe lea mai fafo i tatou tagata faigaluega, o lona uiga ua alu maualuga. O se tulaga maoae lea lau Afioga, aua o lea tatou te vaai foi i ai, na fai le folafolaga a le matou faifeau i le vaiaso lea na tea nei. O se tausaga maoae le tausaga lea na mavae atu nei i le tatou taulaga lafo. Ua matua sili maoae lava le tausaga lenei nai lo tausaga uma. Ae o lau faalogo e faapea foi le tele o ekalesia. O lona uiga o mea na e tautatala mai lau Afioga, o faamaumauga na.

Ona ou oo mai lea lau Afioga i le mea lea sa ou taua, o le isi fua faatautau, o le mea e tau o le mortality rate. O pepe ia e fananau mai, e fua i ai po o a tulaga o le soifua maloloina o tagata lautele, aemaise i pepe faatoa fananau mai. Ina ua ou ulufale mai i le maualuga sa i ai. E oo mai i le tausaga na tea nei, ua matua pau maualalo lava, nai pepe ia. O lona uiga o lea foi ua tele le faasaoina o lea vaega, po o le mea ua laititi tamaiti fananau mai, ia tailo. A o le tulaga manino lena o lea e i ai e tusa o faamaumauga. Ona ou oo mai lea i le lea e taua o le life expectancy rate, le umi o tausaga e mafai ona soifua ai le tagata. I le 2005, e tusa i le 70, o le toatele o tagata e oo loa i le 70 tausaga le matutua o le tele o tagata Samoa. E oo mai i le 2005 ua siitia i le 75 tausaga ma o lo o agai pea i luga. O i e tau mai ai ia i tatou, le tele o le suiga o le tamaoaiga ma le olaga soifua o tagata i aso faipea. O fuainumera nei, o lona uiga foi la, ua matua faatupulaia le fuainumera o i latou o lo o ua faamanuiaina i penisione. A o lea tou te faafofoga ma tatou faalogologo i feau ia tau faavalea ma taufaasee e ave i fafo. E faapea a foi mai ua sii maualuga le penisione, ua sii maualuga. Lau Afioga, mo le silafia e matua, o le tupe lea e tuu atu pea ia i latou le tinoitupe, o lo o faatupulaia pea. Ae i ai nisi o matua ma nisi o latou nei e ono oo lava i le \$1000, \$1000+ e faaogaina i le masina e tasi. O le mau o faamaoniga o lau tala lau Afioga, e manatua o lea e feoi fua i vaa i Savaii ma Amerika Samoa, tala fua a latou vai, nofo fua i le falemai ma isi vaega eseese. O le faamaoniaga o lau tala lau Afioga, ia si ou tina ua mavae atu nei. E faalua ona ma ave i le falemai i le masina lenei na ma nonofo ai. Na ma o atu e fai lana faata, fai le mea e tau o le echo, fai le CT scan. O mea nei e le taugofie, fai fua uma lava mea

nei. Na aumai taofia i le falemai, moe i le okesene, moe i le IV. E faa-lima ona ai i le aso, e faa-lima. Aua e ese lava aiga e 3 masani ma vaiaiga, e tai 2. Ona ou nofo lea ma ou mafaufau, sole, ou te ofo pe a fai e le o mafaufau tagata i lenei mea, e fai fua uma lava nei mea lau Afioga. E fai fua uma, o lona uiga la, a ou nofo ma faavasega le tupe lea na alu i lou tina i le masina lea o Ianuari na i ai i le falemai ma le amataga o Fepuari. E ova i le \$2,000 e sili atu, e ese le cash, tupe lea e avatu, ese services ia, auauna ia e fai fua e le Malo.

O ou matua la, o lea ua malaga i le lagi si ou tina, ae tuua si ou tama, ua tai 85 tausaga. O lona uiga, 20 tausaga o faamanuiaina i le mea lenei, 20 tausaga. E i ai foi si ou aunty lea ua fai nei ma si ou tina i le fale, ua 89 tausaga. O lona uiga ua sili atu tausaga o ola ai lava i lenei faamanuiaga, o le mea lea e tataua ona tatou manatua. O fuainumera na o mea moni na e le ni mea folafolaina, e le o ni folafolaga. Aua e oo mai i le 1991, le faamaoniaga o fuainumera ia e aumai, e na o le 5,000 tagata matutua, sa i ai i le faamanuiaga lea. E oo mai i le 2001 i le taimi nei, ua 11,000 tagata ia ua faamanuiaina, i le taimi nei. Ua ova atu i le faaluaina fuainumera, o le uiga o lena faamaoniga ua soifua uumi tagata. Aisea? Ua malosia le tamaoiga ua lelei le tausiga, ina ua fesoasoani le Malo. O le isi vaega taua o le mea lea, o lea ua logo mai au. O mea ia vaeane lau Afioga ma le faafofogaaga a Samoa, o mea ia o oloa, o taenifo. O mea nei e taugata tele, sa ou faapea e le faia fua, o lea foi e lavea i lalo i faamanuiaga nei mo tagata matutua. Ae i ai la isi ma tatou matua mai fafo, ua o mai ma faaoga ai ma le penefiti lea iinei. Aua e taugata tele mea nei, a o lea e maua fua, e fai fua e le Malo. Lau Afioga, o mea maunua mea ia ou te talanoa atu ai.

Ona ou oo mai lea i le tulaga aoaoina o le fanau, ma i latou faitau tusi, literacy rate. E oo mai i le tausaga 2016, o tama tane tamaiti e 99%, a o tama teine, 99.3% tamaiti o lo o aoaoga ma mafai ona faitau tusi. E i ai le upu faapapalagi foi lea, you can't uneducate someone who can read. E mafai loa e le tagata faitau tusi, e le mafai ona tatou toe faavaleaina, numera ia. E leitioa a fiafia ma saoloto le Minisita o Aoga, e tautala mai faamaumauga nei ina ua tulai mai, malo Loau.

E fai lau tala i le Kolisi o Samoa, o le Kolisi o Samoa, o le Kolisi aupito sili lea ona lelei i Samoa i le taimi nei. Aisea? O lo o Peresetene ai Lealailepule Rimoni Aiafi. O le uiga o lau tala lau Afioga, o faamaumauga, o le faaiuga o le suega 2019 lea e molimau i ai le Afioga i le Minisita. E 100% tamaiti pasi e o i uta i le NUS, e faafetai i faiaoga, le komiti, o matua, a o le uiga o lau tala lau Afioga, e na o le \$40 lea e totogi e le tamaititi i le tausaga atoa, e \$40. E faapefea ona e alu i se aoga e pito sili ona lelei ae \$40 e te aoga ai i le tausaga atoa, o lau tala lea o lea e fai i matua. A o le \$40 lea, e le alu foi i le Malo, e alu i le Komiti lea a matou e fesoasoani i mea fai a le aoga. Ae manatua, o tatou nei i le Palemene, na tatou ola uma mai lava, faaoga tatou e tatou matua i a latou tupe.

**FOFOGA FETALAI:** Se i tulai mai lava le sui usufono mo Palauli le Falefa

**Afioga Hon Faumuina Tiatia Faaolatane Liuga:** Se i fai se malologa a le Afioga i le sui o lo o saunoa nei. Na ou fai i le sui usufono i le auala lea e i totonu o le Kolisi o Samoa, ua matua pu pu lava, ua tele foi ina susu nai tamaiti a o la e Peresetene. Ona ou fai lea i ai i le tausaga lea, se i vaai le auala e fai, ae fai mai o la ua uma ona fai le fuafuaga e fai. Ae toe faamanatu pea i ai ua matua leaga lava le auala. Ma le faaaloalo.

**FOFOGA FETALAI:** Se i tulai mai le Minisita o Galuega.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese):** Ia faafetai i lau Afioga mo le faasaoina o le taimi i le saunoaga matagofie a le sui usufono mamalu. Na o si mea laititi e fia faasao lau Afioga, ona o lo o faafogafoga tapuai mai le aumatutua. Sa taua i le saunoaga a Leala e malaga fua foi i Tutuila. E leai na o Savaii lava, mo le faasaoina o le tulaga lea, ne i mea ane ua mafaufau mai toeaiina ma loomatutua, e tatou te o fua foi i Tutuila. E na o Savaii lava le faamanuiaga lea.

**FOFOGA FETALAI:** E pei sa lavea ai ma Tutuila i aso ia. Ou fai atu sa lavea ai ma Tutuila i aso ia, ae ua ou iloa ua le o toe lavea i le taimi lenei.

**Tofa LEALAILEPULE RIMONI AIAFI:** Faafetai lava i lau Afioga, o le mea lena na ou musu ai e tau. Aua sa o fua, ae sau loa Papalii toe totogi. O mea na e faaoga ai... ae tuaia ia. O lea sa vivii atu nei lau galuega, ae ua e nofo lava oe ma toe faaleaga, ae le afaina. O le mea moni lau Afioga ou te le iloa, sa ou faapea e lavea ai, ae faigofie lava ona faalavea ai. E le se mea faigata lena mea, o le mea foi, se e faigofie lava e le tatou Malo ona sii i le \$1,000 le penisiona i le vaiaso. E le o se mea faigata, a o le mea pepelo ma le taufaasee ma le taufaavalea le mea lena, e le sao. Ae faafetai i le Afioga ia Papalii, you are the best Minister...

**FOFOGA FETALAI:** Se i tulai mai Papalii aua le auala lea e saunoa i ai.

**Susuga Hon Papaliitele Niko Lee Hang:** Faafetai i lau Afioga, ma te le finauina le vaega lea, leaga o lea ua tuuaia o au na toe aveesea le faamanuiaga. Ou te sau lava i i, ua leva ona aveese. Faafetai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E i ai lava lou faaeteetega ne i foi o suaga ae sau ai loa ni saunoaga faafoliga faigofie, aemaise o le

faapea e faigofie ona sii le penisione. O le mea lena, e i ai le tulafono o mea femeiai. A manao e faaputa le isi mea, ae faapae le isi mea. O mea o paluni femeiai, a e manao e faapeti le isi mea ona pae lea o le isi mea. E faigofie ona sii le penisione ae tipi atoa le tupe lea e alu i o e faatino ai aoga. Aua e ala ona alu le aoga, ona o lea ua tauave e le Malo totogi o faiaoga ma isi tulaga tauave. O le mea lena o ituaiga tulaga faapea o ni mea fou, e le mafai ona faatinoina seiloga e muamua ona fai sailiiliga.

O le mea e pito sili ona taua, o le upu foi lea e ave e tatou sustainable development. O lea e faataua e le lalolagi sustainable development. O atinae lelei faaauau, a o le afuaga. E tele naunau mea e tutupu i le mea lea o le faatino o se atinae, i folafolaga fai. E na ona oso lava i ina, le umi lava ona alu taofi lea, muta. Ona o fuafuaga faatopelau, ae le fuafua lelei, ona te i lava lea ua faapeapea ma faapeapea atu lava. O le a avatu le faataitaiga. E talu ai o le fesoasoani na aumai i Ausetalia ma Niu Sila, lea na faaoso ai loa le tatou Malo i le taimi lea, e faaaooga fua isi fanau aoga i totonu o aoga a le Malo. Ona o fesoasoani ia mai fafo mai Niu Sila. Ona alu alu loa lea full stop, uma loa. O le a la le mea ua tupu? O lea la ua taofi mai loa isi atinae a le Malo, avatu loa le tupe e faaauau ai le mea lea ua alu alu motu. O fesoasoani mai Niu Sila ma Ausetalia ua te i lava ua faamotu, oti atoa ai loa, e le mafai la ona toe agai i tua. Ae le mafai ona toe foi i le mea sa o tatou sau ai, o le tatou lava taimi sa o tatou aoga ai. Sa o lava nai o tatou matua, sali popo ma totogi aoga a fanau. O le a le mea lea ua fai nei? O lea ua aoga fua le toatele. O lea ua oo lava i aoga a Ekalesia ua step in le Malo. E alu atu tupe ia, aua e le o se mea matagofie le mea lea o aoga ia a le Malo e mama ia totogi. Ona o lea e tauave e le Malo totogi o fanau nei a le atunuu o lo o aoga i le Malo, ae faafefea la Ekalesia?

O le faavae atoa lena, na ala ai loa ona alu fesoasoani i Ekalesia, ia tau i ai se paleni. O lea foi la ua amata foi ona talanoa i isi mea, ma o le vaega lea, o le a fai le mea lena. E le mafai ona fai se mea e aunoa ma le faatino o le Tulafono o mea femeiai. E te manao loa e fai se mea foi, peti le mea lena, ae faapae le isi mea. O le a la le mea e faapae, e ono taofia ma fesoasoani o lea e ave i isi Faalapotopotoga. O le mea lena e taua tele ai, ae e te le i laa. O le a le mea e masani ona fai? Ia vaai muamua i luma i le mea lea e te laa i ai, o le mea masani vaai i le mea lea e te laa i ai po o le a le mea lea o le a e laa i ai. Po o se pu fafa o le a e laa atu, ae laa atu o le to le sua, ona e laa atu loa lea e pau i lalo i le to le sua, ma e oti mataga atu ai. Lau Afioga i le Fofoga Fetalai, e faapena fuafuaga a so o se Malo, e fai fuafua. Ae te le alu pogisa, faapea na ona tu ae lava o lea, fai le mea lea. O le a fai, o le a fai, faasalalau mai, o le a sii le growth rate o Samoa i le 20%. E oo i le Malo o Amerika ma Saina e tetele tupe e le mafai na oo i ai. Ae o le a le mea lea e fai? O uiga lava ia lea e fai nei, o lea e fai le talaiga i tua. Ou te oo atu loa fai le mea lea, fai le mea lea. O le laki, o lea lava e alu atu lava i totonu o le Palemene le faasaoga o saunoaga soona fai lea e fai talaiga i tua. O le tulaga

la lena i le mataupu lea, e i ai lava le faaeteetega i le mea lea, o le vave o le upu. O le a fai, o le a fai, o le a fai, e faigofie ona fai. O le Faigamalo lenei, e suesue muamua, pe mafai ona fai, ona vaai loa lea i alagatupe e faatupe ai. E na o se talanoa atu, faaaoga ai le mataupu lea e finau ai le toa-lua lea. Ae aoga, leaga o tua atu o le Maota lenei, o... e matautia mea la e folafola ai.

**FOFOGA FETALAI:** O mea uma lava e tatau ona fai, ae ave le faamuamua i le mea e i ai le tofa mamao. O fea le mea e ao ona faamuamua. E pei o le aotelega lena o le finagalo o le Palemia.  
Tulai maia e faaauau le saunoaga.

**Tofa LEALAILEPULE RIMONI AIAFI:** E sao le faauilavea. E oo i ai lau tautalaga i le vaega lea. O le uiga o lau tala lau Afioga, o le Malo, o lea e i ai le aia tatau e fai ai so o se mea. Ae le mafai ona fai ni folafolaga faavalevaea, vaeane se i tulou, ae le mafai ona fai, o le uiga lena o lau tala. Ae le afaina o le a ou oo i ai. Ae ua ala ona oo i ai ma pisa lau lauga ma faalavelavea lau lauga. O le osovale o le sui, si ou tama. O auala e 2 ituaiga faiga e faalemu ai le o o taavale i le auala. O le faapatupatu po o le faaomoomo, o le ala lea lau Afioga o le ala lea o le faaomoomo. Ae faafetai o lea ua saunoa mai si ou uso Minisita o Galuega, o mea ia e lavea uma i lalo o tatou. Ia alofagia le auala lea, e tele le aoga mo le tatou aoga. Ae ua lelei lau Afioga, taatia mai, e pei ua alu uma lou malosi i le academic side o tamaiti, ae galo ai le physical ma le social side. Ae ua lelei o le a taatia mai lou fanoga. O le uiga la o lau tala leaga o lea ua faaluafesasi ae le afaina. Ua oo mai lau tala i le tupe lea e faaalu e le Malo i le faaaoga fuaina o tamaiti, ma tupe ia e faaalu i le tausiga o tatou matua i tausaga uma. A tuu faatasi vaega tupe nei e lua lau Afioga, e lata i le \$50 miliona i tausaga uma, i tausaga uma. O lea e faaalu e faaaoga ai le lumanai o Samoa, ua le na o tala, a o mea o lo o faatino. Aisea? O le finagalo o le Malo ia saoloto a tatou fanau, ma manuia Samoa. A o le isi vaega tele o lea e alu i le tausiga o tatou matua. E le mafai la ona tufa fua, o lea e faatino galuega a le Malo. E momoli atu ai le faafetai i lau galuega faifai pea, tautua faaauau. E le o ni folafolaga po o ni upu e avane ai.

Ona ou oo mai lea lau Afioga i tagata faigaluega. I faamaumauga, e oo mai i le 2001, e 50,000 tagata faigaluega. E oo mai i le 2016, e 55.5 afe tagata faigaluega. O faamaumauga ia mai o i Fuainumera Faamaumauina. E lavea solo ai so o se tagata faigaluega, o le a lava le galuega o lo o galue ai. O se numera tele lea, a fua la i tagata e mafai ona faigaluega, e na o se 3% ni tagata e leai ni galuega. Ae i faamaumauga a le NPF, i mea o lo o i ai tagata faigaluega, o active employment o lo o totogi a latou NPF. I le 2015 e 30,000 tagata sa faigaluega, ae oo mai i le 2019 ua ova ma le 35,000 tagata o lo o faigaluega. O se tulaga taua lea, e le gata i tagata faigaluega, a o le faatupulaia o tatou tupe aoina mai i tatou lafoga nei, ma tatou tupe nei,

saofaga a le NPF. E mai le 2010, e \$27 miliona le polofiti a le NPF, e oo mai i le tausaga ua mavae atu nei i le 2020, ua \$60 miliona le polofiti, le tupe faaopoopo. O i e iloa ai le siitaga o le lelei vaaia o tatou tupe nei e teu faavaitaimi ma invest, aua le manuia o sui fai saofaga ma tatou uma. Ua oo i le \$100 miliona ua aoina mai tagata faigaluega i tausaga taitasi. O lea e auauai mai tupe faamanuiaga mai le NPF, e toe tasi le isi tupe lea e le i sau toe o nei ia Mati. O lea ou te faalogo i le Afioga i le Minisita, o le a siitia le pasene. Ia talosia ia, ae a fai foi e leai, ia malie i lena pasene o le a aumai.

Lau Afioga i le Fofoga Fetalai, o fua faatautau ia e tau mai ai ia tatou ma le lalolagi atoa, se tulaga o i ai se Malo, i ona atinae. Ae le mafai foi ona agai i luma le atinae a so o se atunuu, seivagana, ua lelei ma mautu lana taitaiga e tusa ai i le amataga o sau lauga. Ia manatua foi lau Afioga, o le isi mea e aupito sili ona taua, o le taimi lea e tutupu mai ai faalavelave faafuasei, e pei o lolovai. O lea na mavae atu nei. O le matua tele le afaina o tatou, auala fegasoloai, tulaga faapena, o paipa ua leai ni vai, o le power. E lua i le tolu aso, ua toe faafoi mea uma i le lelei sa i ai. O i e tau mai ai, le tulaga lelei ua i ai a tatou tama fanau, ma le mafai lava e tatou ona faatino e tatou galuega laveai. Ia toe faafoi Samoa, pe a oo mai taimi o faigata. E momoli atu ai le faafetai tele ia i latou uma o galulue, o outou le Kapeneta aemaise o Ofisa Sili o Pulega a le Malo.

O le mea moni lau Afioga, ua tatou i ai nei i se lalolagi ua matua ese lava ma le lalolagi e masani ai tatou. Ua sui atoa e faamai ma le tulaga ua i ai nei, le tatou vaavaai ma le tulaga e i ai le lalolagi i aso faipea. Ma e ao foi ia i tatou ona sui a tatou fuafuaga ina ia mafai ona tatou tali atu i le tulaga o i ai le lalolagi. Aua o lo o i ai a tatou fuafuaga mamao 2040, o le tatou taijala o le SDS tai 5 tausaga. A o le taimi lenei, e oo lava i le polokalame e 2 tausaga, ua faigata ona tatou taumatea pe oo, pe o le a le tulaga e i ai. O le taimi lenei o le talanoa a le lalolagi atoa i le mea e tau o le survival. E ola ai i aso fai pea, ona faatoa oso mai lea o le revival pe a oo ina toe foi mai i le mea na i ai. O le tulaga lelei i le tulai mai o le mea lenei, e tele vaega taua e tupu mai talu mai le faamai lenei. Muamua, o le mea o le food security, o mea taumafa. Ua tele lava ina toe faaaoaga e tatou ia mea o lo o i tatou laufanua. E faafetai i le Afioga i le Minisita, o tatou uma o lo o galulue. E moni foi o lo tatou alolofa i le aufai maumaga i le tulaga ua i ai le tau o le talo, ia talofa. E leaga o au ia ou te faatau lava i le maketi, I am a town boy, I go to the market and buy my taro. E le o au o se faifaatoaga e pei o lau Afioga ma le toatele. Ou alu atu i le Aso Toonai nei, e tai \$10 le tau o le tau talo. Ona ou sau lea ua ou fiafia, ae o nai faifaatoaga.

Ae o le mea lea e tuualalo i lau Afioga i le Minisita, po o fea ua agai i ai fuafuaga a lau Matagaluega i le SROS, ma mea nei. Aua o mea nei i le taimi lenei, e tataua ona faaaoaga ai le tele o fua o faatoaga nei i fuafuaga ma galuega. Aua ua toatele foi tama fanau a tatou, faafetai lava i le RSE Scheme lea e fai nei. E faafetai i le Minisita ma le Malo. O se matua fesoasoani tele

lea, it's like a formal direct aid. O le tupe lea e aumai sao lava ave sao i o latou aiga i tua ma nuu. A o le tele foi o faamanuiaga nei, e foi mai le toatele o tagata nei, ua i ai a latou special skills, ua i ai o latou potu faapitoa i le tele o mea nei. O i latou la nei, e mafai foi ona faaaoga e tatou iinei i falegaosi mea ma fale e agai i tatou mo le agai i le lumanai. E taua tele le vaega lenei lau Afioga.

Ona oo mai lea o lau tala lau Afioga, e i ai lava si mea lea e fia oo i ai lau faamatalaga ae le i oo i le uafu. O le luitau pito sili ona faigata ma ogaoga lea ua feagai nei ma le Malo ma tatou i le Palemene, aemaise le faiga palota lea ua alo atu nei i ai i tatou. O le mea lea e tau o le misinformation, creating hatred and misleading hopes mo tagata. O le taimi muamua lea talu ona ou sau i le Palemene, o le faatupulaia o le tala taufaasese, ma faatupuina le faitagai e ala i folafolaga ogaoga e le mafai ona faatinoina, o tala tau faasese. O mea nei, o mea masani lava i le tele o faiga palota. E folafola atu lea vaega faaupufai, folafola ane lea vaega faaupufai, i mea latou te o mai, o mea e masani ai. Ae o le faanoanoaga lea e i ai lau Afioga, ona o lea ua fetai ma le taimi lenei ua faaaoga fesootaiga foi lea o le social media e fai ai, mo le taimi muamua. Ua faigofie ai ona avatu i tua faaupuga, folafolaga sese e ogaoga ona taunuuga ma le le faamaoni. O le popolega lea i lou loto.

Lau Afioga, o lea ua o folafola, e faapea a toe foi mai e toe faafoi fanua, e toe faafoi fanua faale-aganuu ma fanua... Lau Afioga a talanoa loa i fanua, e ese le taua i lou mafaufau, leaga na o Vaitele lava le nuu o Samoa na faatau ese uma lava le nuu atoa, na faatau e le Tama Aiga sa i ai i na taimi. Na faatau ese uma lava le nuu, e oo i se elele e tasi e leai se mea na totoe. O le fesili la lau Afioga, o mafai la ona toe faafoi mai? O mafai? E le mafai, e le mafai, ona faafetai i le Malo, na talosaga i ai, lea na tuu mai ai nai isi fanua ia na o le 29 eka, ae totogi. E le o mafai ona aumai fua, totogi. A ua fiu foi le Malo, ua fiu tatou e faamalamalama ma lou tagata i ou aiga ma tagata, a i ai sou fanua Samoa o afaina, tau mai, faasino mai po o fea. Ua 12 tausaga, 2008 na tatou pasia ai le tulafono lenei o tatou iinei i le Maota lenei lau Afioga. O lenei ua 12 o le a 13 tausaga o le Tulafono lenei e leai ma se tasi, leai se nuu, leai ni tagata o omai e tau mai se faaletonu o i ai. E na o upu faalele ma upu folafola ma upu taufaaleaga, ae leai se mea o tupu. Ua faatele le faaletonu lau Afioga, aua le naunau ae masaesae ai le upega o le atunuu. Na o tatou faia uma lava nei mea, ae fai ma le alofa.

O lea ua fai mai, a omai faapau lea mea, ae sii lea mea, faapau lea mea, ae sii lea mea. Ae e leai ma se tala o faapea mai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**FOFOGA FETALAI:** Ia, se i tulai mai lava le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ua ou tulai atu lava i le taua o le mataupu leni, tau eleele. O lea foi ua saunoa le sui usufono i o latou laueleele i Vaitele. Ou te le iloa po o ua faafia ona fai le faamasinoga na oo le Faamasinoga. E le mafai e le Faamasinoga na faia se iuga e suia ai le iuga ua taoto ua faia muamua.

Mai lava i le taimi o aso o Siamani. Ma o le taua o le itu lea, ona ou te lei loa po ua faafia ona taumafai le afioaga i Satapuala. O lea foi na oooo lava ina faavevesi e le afioaga o Siumu. Na oo atu lava i totonu o le Malo, ma fai ai iuga, e tele iuga faale-Faamasinoga. O faatauga uma lava ia na fai e oo i le 1,500 faamasinoga na faia e le Faamasinoga Maualuga a Siamani i le taimi o Pulega a Siamani. Ma e tele lava eleele na toe soloia ia fefaatauaiga na fai, ona ua maua ane, ua ova atu le tele o le eleele ua faatau na i lo le eleele o lo o i ai i Samoa.

O le faaaliga lena na ave ifo i le Kapeneta i vevesiga ia na fai i le va o Siumu ma le Malo, na o latou taofia faamalosi ai ia femalagaiga i le va o Apia nei ma Siumu e agai atu i le auala lea i Siumu. Sa ou taofia foi leoleo ae na oo lava ina tagofia auupega. Masalo a na le vave lou taofia o leoleo, e toatele lava semeamanu e afaina ai o latou soifua.

O mea o upu e fai e le tagata e le malamalama, ae ono tutupu ai faalavelave, toetiiti foi tutupu ai faalavelave i Satapuala. O mea ia o le faaoso e le tagata e le malamalama i Tulafono ma faaiuga faale-Faamasinoga ua uma ona fai, lea na iu na toe faatoafilemu, ae a na ou le taofia leoleo, e toatele tagata e ono maliliu ai. I le faigofie o le mea leni o upu e lafo e le tagata faavalevaleyalea, o le upu lena e tatau ona fai. O le tagata e faavalevaleyalea e tautala i mea ia ae le malamalama i le ono aafia ai o le soifua o i latou ua taitaiina sese.

I le taimi faatoa tulai mai ai le Faigamalo leni, toetiiti lava a tutupu ai faalavelave i o i Faleolo ona ua sii mai se tasi o afioaga, ma o latou nofoia faamalosi eleele. O lena na tagoau ai loa leoleo uma lava, e ta loa le 9:00 i le po taunuu loa ma leoleo, o upu a latou sa nofoia, o le a matou liu efuefu lava i inei i eleele ia.

E le mafai ona alo le Malo, o mea o upu e fai e lē auga. O le a la le mea na tupu? Semeamanu lava le vave mai i latou o Taitai ua toe mafaufau i le iuga matuia. Aua e le mafai ona alo le Malo i le Tulafono i le mea e tatau ona fai. O lea sa silafia uma, na toe tala uma i lalo fale, toe o ese, ae tuu eleele o le Malo.

O upu a le Komesina o Leoleo i le taimi lena, na fai ia i latou ia sa taitaiina le solitulafono lea, vaai a outou afioga o lo o taitaiina leni fouvale, o lea ua ta le 5:00. Ua outou le talia le matou tuualalo. O le eseese o tatou, e le i faia sa outou tautoga. O leoleo e fai le latou tautoga, e oti ai lava i mea ia i le tautuaina o le Malo o Samoa, e oti ai lava i i. O le a matou o, leoleo uma o i ai, o le a samania e tatou te feiloai i le ta o le 9:00 i le po, ma o le a aumai



loa auupega e faatino ai le Tulafono. O le ta o le 7:00 na toe tu mai ai le Loia e toe tatalo mai e malie ia, a o upu na a le Komesina o Leoleo, pe e te oti pe feoti matou, ona a lea? E toe foi lava eleele lenei o le Malo o eleele o le atunuu.

Lau Afioga i le Fofoga Fetalai, e mama tele mo le mea o le tagata faavalevatea, ua naunau i le ia, a ua le manumanu i le upega.

Lau Afioga i le Fofoga Fetalai, ia o le fesoasoani atu lena, mo mea o le tagata e leai se malamalama, o le tagata faavalevatea, e alu talanoa i mea ia, o lea e talanoa i le toto. Leaga o mea nei, o eleele o le atunuu, o eleele o le Malo o le Malo o Samoa atoa.

Lau Afioga i le Fofoga Fetalai, o le fesoasoani atu lena.

**FOFOGA FETALAI:** Malo, faafetai ia...

**Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo):** Lau Afioga i le Fofoga Fetalai...

**FOFOGA FETALAI:** Se i tuu atu lava le avanoa i le sui usufono le Afioga ia Toeolesulusulu ia po o le Afioga foi ia Afamasaga leaga o le itumalo lea sa faapena ona tulai mai ai faafitauli lea. Ia faapena foi ona vaai i ai o matou mata i aso ua mavae. Ia ae se i tulai mai ia Afamasaga.

**Afioga Hon Afamasaga Lepuiai Rico Tupai:** Faafetai i lau Afioga i le Fofoga Fetalai mo le avanoa. Ua ou tulai atu ma le faaaloalo ona o lea e taua e le Afioga i le Palemia si o matou nuu. Le afioaga i le Saoalii ma le Aiga Satuala, ia faapea foi le fetalaiga ia Vaili ma le Faleaana Lautinalaulelei ia Tapuala ma Vainalepa.

Ia e leai lava se mea sese o mea ia na saunoa ai le Afioga i le Palemia. O na taimi, o taimi o le pogisa i si o matou nuu ma le itumalo, i le tele o le lē malamalama o si o matou afioaga i nei mea uma. Sa ou miomio ai foi i faalavelave ia e lata mai, i tulaga lava lea sa taofia ai le auala. A o lou tulai mai a o tapena ai foi ma le palota...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**FOFOGA FETALAI:** Ia malie le Afioga se i...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Leai e mamao atu i tua le mataupu lea faatoa tulai mai o le HRPP, o Satuimalufilufi lea ou te talanoa

atu ai. E lata mai la le mataupu lea e saunoa ai e leai la e le o Satapuala lea... ae leaga o eleele uma lava na, lea sa nofoia. E leai la o le taimi faatoa tulai mai le Faigamalo o le HRPP ae tupu ai loa le mea lea.

**FOFOGA FETALAI:** Moni, ou te...

**Afioga Hon Afamasaga Lepuiai Rico Tupai:** O le taimi la lenei lau Afioga, ia ou te tulai atu ma le faaaloalo, ua matua malamalama lo matou nuu ma le matou itumalo i le mataupu lenei. Ae o lea foi na afio atu le Malo i le vaiaso ua mavae e tatala aloaia le matou vai, ia o le ata sa outou silasila i ai i le lagolago a Satapuala ma Faleatiu i faamoemoega o le Malo sa feagai ai, o le ata lena o le lagolago a lo matou itumalo lea ua i ai i le tulaga ua malamalama ai nei, ma ua aumai ai le latou lagolago i le Malo.

Ma o le malamalama, e leni mea e mafai ona toe fai nei mea. E pau o le mea, o le liliu mai e galulue faatasi ma le Malo ma tutu faatasi e fai ni mea lelei e manuia ai o matou nuu. Ia o lou tulai atu lea ma le ava tele i lau Afioga, faafetai.

**FOFOGA FETALAI:** Ia malo, faafetai. Leai o le popolega o le Palemia, ma le Faigamalo...

**Afioga Faalogo Iosefa Sopi (Siumu):** Lau Afioga i le Fofoga Fetalai...

**FOFOGA FETALAI:** Ia i toe ono tulai mai nisi foi o taufaasese, e ono limataitaiina ai le paia o le mamalu o le atunuu. E ono toe faatupu ai le toto masaa, aua e tatou te toe foi i futia ua sola, i taimi o faapena ona... ia o le upu lava e foi mai e po ua valea le atunuu i a latou foi faitauga. O le mea la lea, tatou tausisi pea i le finagalo o le Atua ina ia sulugia pea i tatou i le malamalama.

Ia ona o lea e tulai mai le sui usufono o Siumu, se i tulai mai Faalogo lau Afioga...

**Afioga Faalogo Iosefa Sopi:** Leai e le o se faalavelave e na o se mea e fia faamalamalama lau Afioga leaga o lea e taua le itumalo. Ia e moni le saunoaga a le Afioga i le Palemia, i lena vaitau sa taumafai foi le itumalo i eleele ma tulaga faapena. Ia ua matuu atu lava ia eleele o le itumalo.

E pau le taumafaiga sa taumafai ai, e manatua foi le fale o Asomua sa sii i luga o le mauga, e pei o i ina lea sa taumafai le itumalo e toe aumai le mea sa tu ai le fale o Asomua. Ia o le faamalamalaga lena i lenei itula faamolemole.

**FOFOGA FETALAI:** Ia malo faafetai, ia afio maia ia tulai mai ia le sui usufono o Faleata e saunoa.

**Tofa LEALAILEPULE RIMONI AIAFI:** Faafetai, manatua foi o le tuaoi o Safata ma Siumu sa fai e le tamaloa tuapio foi lea na siia le maa, ia ou te musu e oo i ai o le a loloto tele lau tautala. A o fanua nei lau Afioga leaga e pei e faamamafa foi i le saunoaga a le Taitai o le Malo ma tatou, ua pei o se auupega malosi lea e faaaoga e tagata nei. E faaaoga e tagata nei, e ave ai le feau sese i tagata i fafo, i tagata o tatou nuu ma aiga i inei, a tulai mai e toe faafoi atu.

Lau Afioga i le Fofoga o le Fono, ou te ofo i le le alolofa, ou te ofo. O fea o i ai le tautoga o le loto faamaoni? E faafefea ona fai nei mea faapenei? Ma sa lavea ai foi lo matou nuu, lo matou afioaga o Vaiusu o lena e tou te silafia. Fai foi le mea faapea. O fea o i ai? O la ua tulai mai faletaalo e tua i ai le atunuu atoa ma le Malo. E le mafai ona fai ave faamalosi ma fai ma toe faafoi ni mea, o se tala faaoleole, tala taufaasese, ae o se tala i le le alolofa lau Afioga.

Ia, ou oo mai lea lau Afioga, i folafolaga ia faapea o le a omai faapau le tau o lea mea, faapau le tau o lea mea, ae sii faamanuiaga i fea ma fea. Lau Afioga, o le faanoanoa o lou loto, e i ai nisi o sui usufono matutua o lo o i ai i le Vaega lea, ua sili i le tai 15, 30 tausaga o i ai i le Palemene o Samoa. O so o se atunuu o le lalolagi, e fai fuafua ana tupe faaalu i ana tupe maua.

O lea e maua mai tatou tupe, lava le tausiga o tatou i aso faipea. Ae ala la ona fai ia na i aitalafu laiti, i le atinaeina o Samoa. O lea la ua o ma le tala taufaasese, talofa i ai, ona taunuu ai lea o le upu faapapalagi foi lea, 'a little knowledge, very dangerous'. A vaapiapi le silafia, tele le faaletonu o Samoa, tele le faaletonu.

Ou oo mai lea i le faaaogaina o mea ia o facebook ma le social media. E i ai nisi o le Palemene sa ave le fautuaga i le Malo ma le Palemia e tape le mea lea. E leaga e le na o tatou, aemaise lava i le taimi lenei o le Palota, sa fai foi e isi atunuu o le Pasefika ma isi atunuu o le lalolagi. A oo i taimi o le Palota, tape, se i toe ki pe a uma. Ona e tele ia le feau sese, o le taufaaleaga, ae peitai, e faamalieina foi matou i le tali mai o le Taitai o le Malo. Malilie e tuu ai pea ia, tuu ai pea ia e fai.

E pei ona e saunoa lau Afioga i le Fofoga o le Fono, e le valea tagata Samoa, e le vaivai uma tagata Samoa, e le faatauina foi le tofa ma le moe, tuu ai pea, tuu ai pea e fai. Aisea? Ona e malolosi ma mautu mea e vaia e mata, galuega faatino, i lo o upu faalele ma upu faaleaga.

O le mea e faanoanoa ai, o tupulaga. Na ou talanoa i lau fanau, amuia outou. O tatou nei lau Afioga, o au nei ua ova i le 50 tausaga ma le tele o tatou ua ova ma le 67 tausaga, na o tatou ola ma tutupu ae i Samoa. E tatou te le i nonofo nonofo tatou o tutupu ae i nisi mea. E matuai o tatou malamalama lelei i faafitauli o Samoa. E tatou te malamalama lelei i auala e fofo ai lava ia o tatou faafitauli. Ma e na o tatou vaia ma molimauina le sologa o le atinaeina o Samoa mai i tausaga e tele, progress of development in Samoa. E le i vaai ai ia le toatele lenei. O lea la ua omai aea, tupulaga ia e tai 30 tai

40. Ae aua ne i galo ia outou, tele le ositaulaga, le tele o le sacrifice na fai e Taitai ma o tatou matua mo tatou ma outou, aua ne i galo ia outou. Leaga ua tele ina faatalale ma vaai mama i ai tupulaga o lenei taimi.

A o le fesili, o i ai se mea faaletonu o le Malo? Ua uma foi ona fai i ai tala. Afai e i ai nisi o le Palemene, o i ai ni soligatulafono o tou silafia, ave i le Malo, ave. Aua le nanaina. E leai se Faigamalo o ola i ni mea faalilolilo, ma ni faiga taufaasese. Leaga o lea ou te fai atu sa ou ola i Malifa. Malifa e tasi lava le TV sa o matou matamata ai a o laiti. Matou o i Alafua faatau le fasifanua o matou matua lea matou te nonofo ai, e tasi foi le aiga sa fai le TV matou o matou matamata ai. Omai i le auala pefu, o na mea uma e pei ona tolaulau e le toatele, mea ia e galo i ai tatou lea e tulaga lelei ai Samoa i lenei taimi, aua ne i galo i ai tatou, le tulaga sa taumafai mai ai si o tatou Malo.

E toatasi lava lau tala i le atinae lea o le uafu i Vaiusu, ona ua tele foi ia faamatalaga i ai. O lea foi ua faapea se tasi o sui usufono, o lo o tauva mai ai, a malo mai ai e taofi. O le mea muamua lau Afioga, faafetai lava i le Malo i lenei tofamamao ma le lototetele e faatino lenei atinae mo Samoa. Ae e sili ai ona ou faafetai, i le filifilia o lo matou itumalo e fai ai lenei atinae aua o se faamanuiaga mo Samoa atoa, ae e sili ai mo le tatou itumalo. E pei lava ona i ai faamanuiaga i nuu e i ai foi Matautu, Apia ma Salelologa, o lea o le a manuia ai foi tatou ma... aemaise o le tatou sao lea mo le atinaeina o le Malo.

Ae o le mea muamua lau Afioga, e leai se atunuu e nonofo fai se atinae tele e taugata ae e leai se mafuaaga tatau. O atinae nei e fuafua mai i tausaga, e fai suesuega i tulaga uma, i lona siosiomaga, i tupe faaalu, tupe maua mai. Ae laualuga lava i mea taua nei e 2 lau Afioga, muamua o moomia? O moomia e taumafai? Lona 2, o ai e manuia ai? E talitonu ua tali uma nei fesili. Ua matua moomia lava lenei uafu, e tusa ai o faamaumauga na aumai e le Pule o Uafu, tasi lenei Pule atamai i le sogasoga o le mafaufau, ona o lea foi e nofo i eleele o Faleata.

E leai lava se eseese o le uafu lea, a tatou vaai nei i le maketi, ua faafia ona sii le maketi? Sii mai i Apia, sii mai i Fugalei, sii i o i uta i le mea o i ai nei. O le tatou falemai ua uma ona toe faafou. O le malaevaalele, o lea foi faatoa uma ona tatala i le fia selau miliona na alu ai. O atinae tetele ia na fai ona ua moomia, ua le toe gafatia e vaega nei tauave ia le tulaga o tamaoaiga o i ai Samoa ma le siitiaga ua i ai ia ona atinae.

O le... i le 2015 lau Afioga, i le 2019, 70% ua siitia maualuga ai vaa e taula i le tatou uafu lenei. Vaaoloa ma le tele o ituaiga vaa eseese e 70%. O le tulaga o vaafagota, e 340% ua faateleina ai ia vaafagota. O tulaga mo containers foi ia po o pusa oloa, 30% ua siitia maualuga ai, po o ova i le 10,000 pusaoloa e faaopoopo i le tausaga e tasi. O faamaumauga na lau Afioga, o faamaumauga na e ala ai ona moomia ma faafetai i le Malo.

A toe taatia ia le atinae lea mo se taimi umi, e faatoluina faafaina le taimi e taugata ai. Ae faafetai pe afai e vave faatino ia lea atinae. E le gata i lea, ae o se auala lea e faigofie foi ma auala femalagaai a tagata oso mai i i luma o Mulinuu nei, taamilo atu ai i mea e tataua ona faatino.

**FOFOGA FETALAI:** Ia, e le o toe umi foi se taimi o le sui usufono.

**Tofa LEALAIPELE RIMONI AIAFI:** Ia, ou te le manao lava e oo taeao lau lauga, e faauma lava nei lau lauga lau Afioga, seivagana ua tele le taimi lavea, ona faaauau lea taeao.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**FOFOGA FETALAI:** Ia se i tulai mai le Palemia...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** O le faapogai o lou tulai atu, e faamafanafana i le sui usufono, i te i ua soona popolevale, ae le amanaia e le Malo se pola motu i tua mai i se sui usufono e matua le malamalama i matupu ia. Lona 2, o lea ou te matau e le o se matai Vaiusu. Ia ua ou le iloa po o le a lana pisinisi e talanoa ai ia Vaiusu, e le o se matai Vaiusu.

E leai foi sana aia i mea ia i lalo o le Faavae, lea sa ou faamalamalamaina, o eleele e pule ai le Malo, e alu atu lava i le sami e tau i le mea e sua oooo ai le tai. E le o se mea na o tatou faia nei. O le mea na faataoto mai e tuua, o lea foi sa saofai ai i i toeaina Vaiusu. E le malamalama la i ai le laitiiti lea faatoa fanau nei ananafi. Ia o le faasaoga lena o le auala foi e fesootai mai ai, ona o ata faataitai ia i le taimi lenei, e avanoa lava le sau mai i tai e tau lava i uta i Vaiusu le alavaa. A o le fausia o le vaega e teu ai oloa, e agai atu i o i Faleula. E alu atu lava i i i Vaiusu, e ono, e ono a foi e faalautele atu o le ala lena e ala ai ona tele le ogaeleele lea, e mafai ona alu atu ai lava e le faatuaioia, e pei o le mea lea e i ai nei ia Matautu.

A o i i Vaiusu, e tele lava le ogasami mo le feliiuiga o vaa. E oso ai le auala e feagai tonu lava ma Vaitele, faatoa fesootai mai ai lea i uta, e fuafua ane i eleele o le Malo, ia ma agai tonu mai lava i le mea o lo o mafiafia ai ia pisinisi, ma fale gaosi oloa lea e moomia ia oloa nei, ona mama ai lea o le toe oso mai o ni loli mamafa i totonu o le aualatele. Ae o le uafu la e i tai i Matautu, e mafai ona faaauau pea i vaa nei e i ai meli ona e le mafai ona taofia ia le tulaga lea o le lamatia o vaa i le malosi o le sau i totonu o le mea lea o le au mo ocean swells, lea e afaina ai ia vaa, i taimi o tau louloua.

Malosi tele le sau o le au ma tui ia vaa, tui i le uafu o le ala foi lena e fai ma malepelepe ai uafu ma toe faafou.

Ia ma e o lea foi na o tatou matauina na iu lava ina uunai atu e le malosi lea o le mea o le au le malosi o le tulei a le au, lea na avatu ai lava le isi vaa faatietie i luga o le au. Ua i ai la mea ua tutupu e faamaonia ai ia suesuega ia a inisia, e le malamalama i ai ia mo tagata faitio faatoa fanau ananafi.

Lau Afioga i le Fofoga Fetalai, o le faasilasilaga lena.

**FOFOGA FETALAI:** Malo, ia tulai mai lau Afioga i le sui usufono mamalu Lealailepule... faaauau lau saunoaga e le toe umi foi le taimi o le tatou galuega o lenei aso, manatu e a foi... ia o ananafi ma le aso ua 2 lava ia aso atoatoa, la ua i ai totonu ma le taimi sa outou fetuunai ai ma le mamalu foi o le autaaalo.

**Tofa LEALAILEPULE RIMONI AIAFI:** Faafetai i lau Afioga, faafetai i lau Afioga, o le a faauma atu nei lau lauga i nai vaega ia, ia ona tuu lea o lau faafetai ona e fai si tele se i fai taeao pe a tusa ai ma lou finagalo lau Afioga.

Leai o le saunoaga a le Afioga i le Palemia, o le mea lenei o le popole, ou te fiu e sue i lau dictionary e le maua ai. E le maua i lou tagata le mea lea o le stress, e ola fiafia lava au ia, leaga foi e tasi lava le mea e silasila i ai le Atua, o lou loto. A mama lava lou loto ma ola fiafia, e te le popole foi. Ia aua o lea ua o fai folafolaga ma mea i tua. Ua uma ona tofofi e le Atua lana Palemene lau Afioga. Ae o le mea na ala ai ona oo lau faamatalaga i le mea lenei, e sao lelei le Palemia.

O au o le sui usufono o Faleata Sisifo e oo mai i le aso seiloga e taape le Palemene. O au, o le ala lea o le tau avatuina o se faamalamalamaga ma se faamaninoga ona o lo o faafofoga mai taga o lou itumalo lea e taufaasese e tagata nei. Ae faafetai o lea ua faamanino o se atinae e pito sili ona taua, e le gata o Samoa ae o le tatou itumalo.

O i i Vaitele mo le silafia tagai i Hansards, o i i na ua i ai uma lava fuafuaga o uafu, malaevaalele, mea uma lava ia faapea i le amataga. Ia ae i ai foi ia latou polokiki i na taimi ma fuafuaga a i latou na mua i malae ou te le fia tautala i ai a o i i, e i ai uma lava. O lea e avatu ai lau fautuaga i le Malo, lau Afioga i le Palemia, faafetai lava o lea ua taofi le toe faatauese o fanua o le Malo o i. Ou te talitonu foi, a i ai nisi fanua o avanoa, e tatau ona tagai i ai le Malo, e aoga le taofi e le Malo aua ana atinae i luma. E le gata i i Vaitele a o i inei i le taulaga, o nei i le taulaga.

Faafetai i le NPF, ACC ma isi o i latou na faataua ia fanua ia e avanoa. I lou lava talitonuga lau Afioga, e tatau ona taofi uma e le Malo ia fanua i le taulaga mo Samoa atoa ma atinae o fofou. O se fautuaga lea ma se tuualalo, e le gata i lea, e le o po se lilo, e le o pogisa le Malo i atinae ia ua afaina tele ona o le faamai e pei o le turisi ma nai tagata ia e aafia. Ae ou te talitonu o

lea o le a saunoa i ai le Afioga i le Minisita i se taimi foi o muamua, aua o lea lava e tatou te iloa, nai pisinisi ia ma atinae ua afaina, ave foi le fesoasoani a le Malo aua e toe foi mai lava, e toe foi lava le lalolagi, e toe foi mai ia o tatou tagata, a ia maua pea ia le faamama avega ma le fesoasoani e tataua ona fai mo i latou nei o lo o afaina, afatia.

O le UTOS lau Afioga, leaga o lea sa taua, e ese le aoga o lenei atinae. E aoga tele lenei atinae mo tatou le lautele. E toe foi lava i le aso fiafia o si o matou tina. Ou valaau mai lava i le Susuga i le Alii Pule tuli atu le tamaitiiti ma le siaki e faasaini. E aoga ia o teugatupe nei, aua a tuu i le faletupe, e alu alu lava faaoga. Ae aoga tele nai teugatupe nei. Ia o lea la ua avatu ia le \$50,000, ae ou fesili atu, e fia le paleni na e i ai? E laitiiti lava Leala e toe \$450,000 lau paleni lea e i ai. Ia o lea ua faafofoga mai ia le itumalo, alu atu uma lava e fai le oti.

**FOFOGA FETALAI:** Ia, viia le Alii i le tamaoaiga.

**Tofa LEALAILEPULE RIMONI AIAFI:** Lau Afioga o le a sou finagalo a ou foi mai loa taeao, ia faauma lelei loa le ta lauga e na o le faafetai lava, ne i te i te i foi fai motu i lenei afiafi, ae ou te fia faafetai e 50 minute ou te fia faafetai ai e faafetai lava na o lau Afioga pe a tusa ai ma lou finagalo. Ae a leai, ia o lea o le a faauma atu loa.

**FOFOGA FETALAI:** Ia, faafetai, faafetai lava, faamaea maia.

**Tofa LEALAILEPULE RIMONI AIAFI:** Lau Afioga i le Fofoga o le Fono, o le a seu i fanua se upu a lenei itumalo. O le a foi le maga a le ofe a le tautai aua le tapuaiga a le itumalo ma aiga. Faafetai i le tapuaiga a Samoa, afio o lau Afioga Le Ao Mamalu o Le Malo, ma lau Masiofo, afio le Sui o le Fono a Sui Tofia ma lau Masiofo.

Faafetai i le au ositaulaga i la outou pitolaau i agaga o Samoa i le faatuatua ma le ola e faavavau. O la outou tatalo e manuia ai le alofaiva o le Palemene o Samoa. O la outou tatalo foi o le a tofofi mai ai e le Atua Taitai mo Samoa. Pau o lea le tuualalo i nisi o faafeagaiga, aua tatou te tatalo faaituau, e le o le finagalo lea o le Atua, ae tatou tatalo mo le manuia o Samoa. Ae aua le faaogaina le pulelaa e lauga mai ai e sui le Malo. O le a sa outou faafofoga ae matou lauga atu iinei, sui le lotu e o i ai tagata e lolotu ai? Lau Afioga, o le tuualalo lea. E le o faifeau uma, ae leaga o lea ua tatou vaai ma faalogologo i nisi o faafeagaiga, e avatu ai le tuualalo, aemaise le Ekalesia pele i o matou loto le tatou EFKS. O au lau Afioga, na amata lava lou olaga i le EFKS, si toeaina o Alesana ma lona faletua ia Vii, sosoo ai ma Sulufaiga ma lona faletua, o Sulufaiga sa Taitaifono i le EFKS, sosoo ai ma Iupeli Ieremia. Sosoo ma Anesone Tavita ae faaiua ia Tavita Anesone. E le tasi e 6 faifeau EFKS sa tapueina lo tatou olaga tuputupu ae. E momoli atu ai le faafetai tele.

Faafetai foi i lau faifeau ua ou lotu ai nei le Susuga ia Pastor Samoa Unoi ma lona faletua. Po o fea lava e o i ai, e le o galo ia i tatou le tatou Ekalesia. Ae faafetai i le tou galuega, faafetai i le tou galuega o ositaulaga a le Atua. Ae na pau lea o le tuualalo, alolofa, alolofa...

**FOFOGA FETALAI:** Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o au ou te le o malamalama tele i le saunoaga a le sui usufono, aua e le faapea o aofia uma ai le Ekalesia, atonu na o le toaitiiti lava o i latou ua seetia i mea o saunoaga faatosina. Ia ae le faapea o aofia uma ai le Ekalesia, o uiga lava ia o tulaga i nei ona aso. E le avea foi se toa-tasi po o se toa-lua ona taua atoa ai lea o le Ekalesia, o se Ekalesia pito tele lea i Samoa. Ma ua leva foi ona galue i le faasaoina o agaga.

Ia o le fesoasoani atu lea lau Afioga i le Fofoga Fetalai.

**Tofa LEALAILEPULE RIMONI AIAFI:** Faafetai. E faamalulu atu i le aufaigaluega a le Atua, a o le faafetai lena ma le tuualalo i la outou galuega, leaga e taua.

I le paia o Samoa i ona tulaga faalupe, mai le taisamasama seia paia le oneone le ufitia, faamalo i la outou tapuaiga, aemaise o la outou taitaiga, o lena ua to lo outou matupalapala, ua amanaiaina e le Malo e ala i lana Faavae pulega mamalu a alii ma faipule. Aua ua matou talitonu, o le nofo filemu o Samoa i aso faipea, o la outou pulega maopoopo ma le mamalu, aemaise o lo outou galulue faatasi ma le Malo i ana atinae. O le mea moni lau Afioga, o le taimi lava e vaivai ai pe mou ese atu ai le mamalu o pulega a alii ma faipule, o le taimi foi lea e fetai ai Samoa ma faigata. O pulega ia lau Afioga ua faamaonia i lou itumalo, e tatau ona ou faafetai i lau Afioga i le Fofoga Fetalai. E oo mai lava i le aso, le taimi nei, o lo o tau faavasega i lou mafaufau ma lou tagata vaivai le pule ma le palealii na faapaleina ai au e lou nuu ma le itumalo. O se mea e seasea tupu, ma sa mamao foi i ou manatunatuga, aua na o au o se tagata faatauvaa. O le a foi se tautua le tua, a o lenei ua aumai lau faatupu ma lau faatamalii ma le faaaloalo maualuga, e atagia ai pulega mamalu, fetuutuunai le tofa ma le moe.

Lau Afioga i le Tama a le Fale lau Afioga Mataia Lynn, o lau mau tauave ina ua avea oe ma sao o lenei nuu ma le aiga, o le fealofaniga ma le maopoopoga le mea sili ona taua e tusa ai o lau lauga i lenei aso. Faafetai i lou manatu i lou nuu, lou titi faitama. Le paia o le tatou nuu i lau Afioga i le Aloalii Galumalemana faapea Tupuola, Tagaloa faapea Siliga, lo ouluga Toalua Toi ma Pula, faletua ma tausii ma le paia o le tatou nuu, ia, e le mama ia te au lenei faaaloalo maualuga. O lea ua silamio Samoa i le tulaga ua i ai



le pulega i totonu o le tatou nuu ma lau faaaloalo. Talosia ia aoga lou nei ola e tautua ai ma le loto atoa ia te outou.

E le faagaloina foi le paia ma le mamalu o Samoa ua alaala i lenei nuu o Vaitele. E le o toe tusiesea outou, o tatou lava ua tasi, ma e le faapitoaugafa pe faapito sou manatu i le nuu ae a outou. O le a ou galue ma le faamaoni ia tatou maua se nuu filemu, aua e le oge tagata le nuu o Vaitele. Tasi lenei nuu faamanuiaina i ana tama fanau, a ua aumai la outou pule ma la outou faaaloalo. Ia, faafetai, faafetai tele.

I si ou nuu o Vaiusu, i le susu o Seiuli o le Alo o Malietoa, ia, lau fetalaiga Ulugia ma lo outou Aiga Sa Ulugia, le Falefia o Alii. Ia, sa tatou faamavae lelei. Na ou oo atu ma lau faaaloalo aua le tou faaaloalo maualuga fai a tatou tala, pe ou te le toe foi mai, a o lena ua to le tou matupalapala.

Ia, le afioaga i Toamua i le afifio o Ale ma Ulu ma o la Aiga, le Gafa o Aatoe, e momoli atu le faafetai i la outou faaaloalo maualuga, aemaise le nuu o Saina i le afio o le Tuitoga, Motuopuaa ma Lauaki, aemaise le tapuaiga a nai faifeau, o le au ositaulaga i totonu o le itumalo, ia, e momoli atu lava le faafetai tele. Tatou te mafuta pea.

Lau Afioga i le Fofoga Fetalai, talofa, o le a misia oe i ou uiga tausaaafia, tauagafau ma lou faatamalii. E le faigofie le Fonousu a Samoa, e moomia le tagata e lava le tofa ma le moe ma le faalagolago i le musumusuga a le Agaga. Ae ou te le tau selu atu lau Afioga, o oe le isi tagata ua tautala lou olaga finau i totonu o Samoa. E le gata i le atiaieina o lou lava aiga, a o lou sao i le Palemene ma upufai, mai se tagata faatauvaa. E faa-lua ona e Fofoga Fetalai, ua e Minisita. E momoli atu le faafetai tele i lau Afioga i lou faapalepale ma lou lotonuu. Ua e foi foi i lou loto faitalia. O faamaumauga ia e tumau. Ia faafualoa lou soifua e te sapi ai i fua o au galuega. Ia faamanuia foi le Atua i le faletua ia Naoupu, le nofo a alo ma le aiga o lo o tapuai mai.

Lau Afioga i le Palemia, a faasaofai e le Atua le tagata i le Nofoa, na o le Atua foi lava e na te aveesea. Ae a faasaofai e tagata, e aveese foi e isi tagata. O oe o le meaalofa ia Samoa. Ua tu matila Samoa i le lalolagi i lau faaeaea ma lau galue i totonu o le Pasefika atoa, ua aveae oe ma Taitai Sinia, e fesili i ai le Pasefika. O pulega o Malo o le Taupulega, le lalolagi atoa, ua ave maualuga le vaai ia te oe ma le Faigamalo. Ou te ofo, ou te ofo i se Samoa e le manatu i ia mea. Aisea? Ua uma faafitauli fetaii tetele o le lalolagi na tatou faafesagai i lalo o lau taitaiga ae tulai mai. E tasi lava le mafuaaga, e te ola faatuatua ma e faalagolago i le Atua. Faamanuia le Atua i lau taitaiga.

Afioga i Minisita o le Kapeneta aemaise le Afioga ia Tuitama lea tatou te taua o le Minisita lelei, a good Minister. Ia, lea ua talitonu o le a e toe foi i fanua. E tele lou sao, e le gata o oe o le sui usufono, a o oe o le alii Fomai. Malo faafetai. E i ai lau meaalofa ia te oulua ma le Fofoga Fetalai. O le fai Isaraelu lea e pisa ai nei aua ou te iloa e fiafia i ai i faatoaga, fai mai lou tama ia te au, “E te iloa le fofo o le fai Isaraelu lea, alu e toto faatasi faafeusuai ma le misiluki, ona maua ai lea o le fai fou e tau o le Misielu.” O le fai la lea

lau Afioga, e matua matautia le fua lea o le a i ai nei. O le a avatu ni lua tamai fai e toto aua le... ae faaigoa foi la i lua igoa, o Misitama ma Misifoa.

Ia, sui usufono matutua lau fetalaiga Saleaula, ia si ou uso Mulipola e le o afio mai aemaise le Tama Matua ia Aeau, ia manuia le faiga malologa. I lou talitonuga, talosia a ou oo foi i lea mea o lota malolo lava i lota loto fuatia ifo ae aua le faamaloloina ita e tagata o le itumalo.

Sui usufono mamalu o le Palemene, ia, e avatu lau faamanuiaga, tatou te toe foi uma mai. Fai mai Leaana ia te au, vaeane le Afioga i le sui usufono, "A ta vaai i faamaumauga e 50% e le toe o mai, e vaivai lota loto." Ou fai atu i ai, "Leaana, ua e iloa o oe o lau matatia lea e ola i Samoa, o le Taitai o le Itu Agai ma le Minisita ae e oso mai i le va e malo? Aua e te loto vaivai, aua e te loto vaivai." Ioe.

Ia, nai Ofisa Sili o Pulega o Matagaluega a le Malo, faamalo i le tou tautua matavela, le faalogologo tiga. Ina ua amata le ma paeauga ma le Afioga ia Afamasaga, sa ou talanoa i Ofisa Sili o Pulega o le matou Matagaluega, Sector, ma fai lau tala lenei, o le laualuga o a outou galuega, o le puipuia o le Minisita ma lona Ofisa. You have to protect the integrity of the Office of the Minister. E faapefea ona fai? Faatino la outou galuega, aua le fefe e aumai fautuaga e tatau ona fai. O matou, we are lay people, e le loloto foi le matou malamalama i le tele o mataupu, a o outou na tofiaina e le Malo, ona o lo outou atamamai i tofiga nei. A outou alolofa i le Minisita, fai le fautuaga e tatau ona fai. Faamalo. Fai mai le isi Taitai o Amerika, "O tatou nei o Taitai na o le fai tonu, a o nai tagata nei, o latou nei e o e tau le taua ma malilui ai." Ia, faafetai i la outou galuega, ia faamanuia le Atua, aemaise i a i latou o lo o gafa ma Falemai, Leoleo, Fui Mu, Faalavelave Faafuasei, faamanuia le Atua ia te outou.

Oo mai lea o lau tala i lau Afioga i le Minisita, Afamasaga, ia, e le tau faia sou molimau. A lea ua molimau Samoa, molimau Samoa i nei galuega tetele ua e faia, TV, Leitio, mea uma lava, big cables, small users, big cables, big users, o a mea uma. Faafetai lava i lou lototele e filifili au ta te toa-lua leaga e faigata Leala e seasea mananao i ai nisi. E i ai foi taimi e sopotuaoi ai ta faamatalaga, ae faafetai i lou faapalepale, faafetai foi i au galuega i lou itumalo, o lea faatoa feinu vai Satapuata, feoai Faleatiu i ni auala lelei talu ona Sisi le Fua o Samoa. Faamanuia le Atua i lou toe tulai mai Afamasaga.

Ia, ona faaii lea o au tala i si ou aiga. Papa, ia, faamalosi mai, toe 10 lava nai tausaga ta te mafuta ai. Faafetai lava ua avea lava oe i lenei taimi e faamalosiua ou te vili atu e te faamanuia mai. Ia, nai ou tuafafine ma uso, si ou tina matua ia Kesa, ia, matua o si ou toalua ma tagata uma, nai au uo i Samoa ma atunuu i fafo o lo o tapuai mai, faafetai i la outou lagolago ma la outou tapuaiga. E malosi lava Leala ia te outou i a outou tatalo. Faafetai le alolofa, faafetai le tapuai mai ia Samoa.

Lau Afioga i le Fofoga Fetalai, ona faaii lea o au tala i si au masiofo. Si ou toalua ma si au fanau, faamalo. Faamalo le lototetele. O i latou nei e sao ai

le upu foi lenei o le saia fua o le maaveave le fua i le tele o taimi e aafia ai latou. Ae faafetai lava i lou lototele, e fiu le fili e fealuai i lou mafaufau, ae manumalo lava Iesu. Ioe. Aisea? Leaga foi na o oe lava e te masani ia Leala ma lona loto. E le i filia e Leala se penina tautetele, e le i filia e Leala se maa taugata, na filifili e Leala le tagata e alofa faamaoni. Faamanuia le Atua ia te oe. Si au fanau, ia o le mea lena ua ave ai outou e faasikolasipi ia outou popoto toe iloa ai le mea sao ma le mea sese. Aua foi tou te popoto tele i te i ua outou fiapopoto ia Leala, ae poto Leala ia outou.

Ia, Samoa, ia faamagalo se upu ua sala, sese a lenei itumalo. Ae ia manuia le Fonousu a Samoa. Manuia Samoa i lana tapuaiga, aemaise le Faamasinoga ma i latou ua pau i le tautalaga, ia faamanuia le Atua i lo outou alofaiva. Manuia Samoa. Soifua. Faafetai.

*Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Faleata Sisifo.*

**FOFOGA FETALAI:** Ua faamalo saunoa i lau Afioga i le sui usufono mamalu lau Afioga Lealailepule, ua faafofoga Samoa aemaise o lou itumalo, aemaise foi lenei Palemene, aua o lau Afioga o se tasi o sui usufono e toa upu, e saunoa tuusao. O se sui usufono foi e faapena ona faaali lona finagalo i la Keriso foi lea, “O ai ea e alu ae i le Alii? Ua na o ē e i ai lima mama ma le loto e mama.” O i ina e mafua ai ona saunoa tuusao le isi sui usufono, aemaise o le faatinoga o le finagalo o le itumalo. Ia ua ou manatu e sao lava oe, e le taua le taimi pe umi pe puupuu, ae taua galuega ua faatino aua e tautala aso, e tautala galuega. Ia, ua moni ai le upu a Saulo ia Tavita, “E te faia lava e oe mea sili mo le itumalo ma e manumalo ai pea lava.” Ia, o lea ua e tulai mai, ia amuia oe ua leai sau palota. Ia, o le valaauina lena a le Atua. E pei lava foi ona e saunoa, a faatu e le Atua le tagata, na o le Atua lava na te aveesea, ae a faatu e le tagata le tagata, e toe aveese foi e isi tagata. E faapena. O lea ua e aumaia le tala mo le tatou Taitai aemaise foi o le Vaega Faaupufai, ia o le lagona foi lena. O le ala lena e manatu ai, ia tatou tatalo ma mafuta i le Atua, o le auupega sili lena. Ma o i ina, o le tatou sootaga vavalalata lena ma le Alii, o le tatou tatalo ina ia faapena ona mafutaina i tatou ma fesoasoani mai le Alii i o tatou faafitauli. Ia o le lagona lena ma le tatou talitonuga.

E i ai le manatu, ia saga faamanuia pea le Atua i lau Afioga i le sui usufono mamalu aemaise foi o le tatou Palemene. Samoa ma lau tapuaiga, ia o lena, o le saunoaga lena a le sui usufono mo Faleata Sisifo e tusa ai o le faamoemoe ma galuega o le Fono o lenei aso.

Ae tatou te le i... leaga o lea ua tatou toai taunuu i le mutaaga ma le siui o lenei aso i feau ma galuega. Ona ou faapea lea, ae tatou te le i tolopo, ou te tapa le sui usufono mamalu mo Anoamaa Sisifo, le Susuga ia Lufilufi po o le Susuga foi i le faifeau na te faaiuina le tatou Fonotaga i se tatalo.

*Na tolopo Taulumaga a le Fono Aoaio Faitulafono i le itula e 1:12 i le afiafi seia aulia le Aso Lua, 16 Fepuari 2021 i le itula e 9:00 i le taeao.*